

陸放翁全集

劍南詩稿

冊七



劍南詩稿目錄

卷第二十六

醉臥松下短歌 霜艸 冬夜 村東 小園

書適二首 雨狂夫 白髮 檢舊詩偶見在

蜀日江瀆池醉歸之篇悵然有感 十一月四

日風雨大作二首 冬日觀漁獵者 雨晴

病起 奉祠 假寐見海山異甚作小詩記之

松下縱筆四首 拜勅口號二首 閑居

十一月十八日蒙恩再領沖佑鄰里來賀謝以

長句 題老學菴壁 冬晴日得閑遊偶作

示元禮 書巢冬夜待旦 醉後莊門望西南

諸山 著書 探梅 歲莫風雨二首 自夏

秋匱甚慨然有感 題四仙像四首 自責

自解 午睡起消搖園中因登山麓薄莫乃歸

羣兒 久疾灼艾小愈晚出門外 夙興弄

筆偶書 縱筆 冬晴閑步東村由故塘還舍

作二首 十二月八日步至西村 夜聞湖中

漁歌 忽得京書有感 晚步門外書觸目

親舊書來多問近況以詩答之 開書篋見韓

无咎書有感 夜大雪歌 寄宇文成州 示

子聿 雪 夜坐 春雨 夢與數客劇飲或

請賦詩予已大醉縱筆書一絕覺而錄之 世

事 二子 謝郭希呂送石洞酒 飲酒 無

題 雨雪兼旬有賦 北窗睡起 立春 曉

枕 落梅二首 閑居無客所與度日筆硯紙

墨而已戲作長句 壬子除夕 癸丑正月二

日二首 避世行 稽山農 牧牛兒 讀書

未終卷而睡有感 早春新晴 枕上聞禽聲

感舊 夜雨三首 初晴野步 明日復雨

排悶二首 小室 浮世 紅梅二首 湖上

晴甫一日復大風雨連日不止遣懷 癸丑上

元三夕皆大雨雪 寓歎 幽興 細梅三首

劍南詩稿卷第二十六

宋陸游務觀

醉臥松下短歌

披鹿裘枕白石醉臥松陰當月夕
寒藤天矯學草書
天風蕭森入詩律忽然夢上百尺顛
綠毛邂逅巢雲
仙相攜大笑咸陽市俯仰塵世三千年

霜草

入冬已兩旬澤國霜始賈可憐青青草
一夕生意盡
嗟予蒲柳姿去日若飛隼草衰有復榮
我髮寧再鬢
微官雖置散束帶終自憫漸退用婦言
千載付一晒
白樂天詩曰猶被妻兒教漸退莫求致仕且分司

冬夜

百錢買菅席錦茵亦何加
疋布縫麤裘安用狐腋奢
昨者南山僧松肪寄一車
可以照讀書堅坐待朝霞

顧影為發笑山童雙髻了一掬琴高魚聊用薦夜茶

村東

村西行藥到村東沙路溪流曲折通莫問梅花開早晚杖藜到處即春風

小園

新作小溪園牽藤迆縛門釣舫橫北渚樵路接東村靜坐依林樾慵眠傍竹根還家日已夕棲雀鬧黃昏

書適

老翁垂七十其實似童兒山果啼呼覓鄉讎喜笑隨羣嬉累瓦塔獨立照盆池更挾殘書讀渾如上學時

又

家食身無役耆年力未衰寓歡那待酒隨意或成詩窮達元非我冤親竟是誰惟嗟見事晚枉却鬢邊絲

狂夫

狂夫與世本難諧醉傲王侯亦壯哉奕奕方收巖際電酣酣已起枕間雷回天力在人終歎入月星來敵

自摧千載鬼雄皆國士直令窮死未須哀

白髮

白髮今年一倍增閉門養此老無能牛羊被野霜天
晚禾稼連雲歲事登未午春炊餘脫粟乍寒包裹有
龕繒自憐未廢詩書業父子蓬窗共一燈

檢舊詩偶見在蜀日江瀆池醉歸之篇悵然有

感

江瀆池頭爛醉歸青旗日晚插城扉正馳玉勒衝紅
雨又挾金丸伺翠衣老境漸侵歡意盡舊遊欲說故
人稀憑高三歎君知否倦鷓無風亦退飛

十一月四日風雨大作

風卷江湖雨闌村四山聲作海濤翻溪柴火輒蠻氈

暖我與狸奴不出門

僵臥孤村不自哀尚思爲國戍輪臺夜闌臥聽風吹
雨鐵馬冰河入夢來

冬日觀漁獵者

人閑漁獵各相從
南陌東阡處處逢
繡羽觸機餘耿介
錦鱗出網尚噉喙
傍觀扶杖常移日
就買還家足御冬
更待風霜都過盡
却從春野看春農

雨晴

山川炳煥似闢國
風雨退收如解嚴
老子真成無一事
抱孫負日坐茆簷

病起

少年射虎南山下
惡馬強弓看似無
老病卽今那可說
出門十步要人扶

奉祠

明窗松石供琴薦
小鼎山泉煮藥苗
乞得奉祠還自愧
猶將名姓到中朝

假寐見海山異甚作小詩記之

海如黛色深浪作雪點
濺數峯黃金山巉絕
出水面此非想與因了了
目中見何時真往遊
浮世付掣電

松下縱筆

自掃松陰寄醉眠
龍吟虎嘯滿霜天
却思初到人間
世似是唐堯丙子年

又

老不能閑莫笑予
五千言豈世間書
青松折取當塵
尾爲子試談天地初

又

種玉餐芝術不傳
金丹下手更茫然
陶公妙訣吾曾
受但聽松風自得仙

又

髯龍夭矯欲飛去
百尺蒼藤羅絡之
應笑此翁才不
進故將老氣起吾詩

拜勅口號

黃紙如鴉字今朝
下九天身居鏡湖
曲銜帶武夷仙
日絕絲毫事年請
百萬錢祠俸錢粟
絮帛歲計千緡有
畸恭惟優老政千古
照青編

又

扶病中庭拜君恩抵海深頓增新祿格暫拂舊朝簪
心欲先營酒兒言且贖琴人生奉祠貴喜色動山林
僕以官視大卿監俸給皆增於昔尤爲忝竊也

閑居

土鐺茶七椀瓦甑稷三升兀兀能言石騰騰有髮僧
淨巾裁白氎拄杖采紅藤尚喜冬來健逢山得遍登
十一月十八日蒙恩再領冲佑鄰里來賀謝以

長句

綠章封事徹虛皇黃紙除書降野堂海上春常探先
到壺中日已不勝長冰銜再署仙班貴鶴料重支玉
粒香便掛朝冠亦良易金銅茶籠本相忘 往時嘗使闕
者例餽茶三年今不講已久余蓋未嘗霑及也

題老學菴壁

此生生計愈蕭然架竹苦茹只數椽萬卷古今消永
日一窗昏曉送流年太平民樂無愁歎衰老形枯少

睡眠喚得南村跛童子煎茶掃地亦隨緣
冬晴日得閑遊偶作

不用清歌素與蠻閑愁已似解連環閨年春近梅差
早澤國風和雪尚慳詩思長橋蹇驢上棋聲流水古
松間賤天公事君知否正乞柴荆到死閑

示元禮

燕居侍立出扶行見汝成童我眼明但使鄉閭稱善
士布衣未必媿公卿

書巢冬夜待旦

掃葉擁堦寒犬行編茆護柵老雞鳴風霜漸逼歲時
晚形影相依燈火明史策千年媿豪傑關河萬里愴
功名固應死抱無窮恨老病何由更請纓

醉後莊門望西南諸山

身是咸陽舊酒徒龍鍾猶復復泥村酤百年略似夢長
短一醉且隨家有無登覽未應慚脚力功名正爾歎
頭顱夕陽又凭闌干立誰畫三山岸幘圖

著書

平生著書汗馬牛一事不施今白頭河洛未清非我
責山林高臥復何求愚公可笑金堆屋老子唯須糟
築丘華表無人識歸鶴煙波底處有馴鷗

探梅

我遊東村衝暮煙斷橋流水鳴濺濺欲尋梅花作一
笑數枝忽到拄杖邊高標元合著山澤絕豔豈復施
丹鉛定知曾授餐玉法不爾恐是凌波仙錦江賦詩
忽萬里蓬山把酒今三年相逢風味宛如昨人生何
者非前緣頗思取醉極清賞杖頭幸有百許錢但判
插破烏紗帽莫記吹落黃金船

歲暮風雨

驕風起海滋浩蕩東北來鐵騎掠陣過秋濤觸山回
老夫北窗下坐守寒爐灰處世困憂患萬事學低摧
便欲滅燈睡門閉不敢開竝海固多風汝孱良可哀
念昔少年日從戎何壯哉獨騎洮河馬涉渭夜銜枚

又

一冬少雨雪人意常昏昏夜半有奇事雨聲卷江村
陸子真老農破屋依頽垣扶持衰病身收召謹逐魂
手烹牆陰薺美若乳下豚聽雨取一醉不厭村酒渾
眼眚燈生暈衣弊蟲可捫父子幸相守萬事何足論
自夏秋匱甚慨然有感

萬卷縱橫眼欲枯老猶閉戶誦唐虞故人誰復訪生
死鄰父幸能通有無雲子翻匙新稻飯天吳圻繡舊
衣襦時平得掩松根骨也勝王孫泣路隅

題四仙像

反虜鯨鯢世共讎漢公勳業過伊周市門灑淚塵埃
裏誰與朝廷植委裘 梅福

又

世上年光東逝波咸陽銅狄幾摩挲神仙不死成何
事只向秋風感慨多 薊子訓

又

曾看四嶽薦虞鰥閱歲三千一瞬間歸臥青山孤絕
處白驢常伴白雲閑

張果

又

蓮花峯下張超谷此老何曾有死生聞道風清月明
夜至今鼻息亂松聲

陳搏

自責

窮途敢恃舌猶存小築城西十里村未掛衣冠慚士
節免輸薪粲荷君恩文章跌宕忘繩墨學問荒唐失
本原仕宦一生成底事子孫世世記吾言

自解

四十頭顱已可知殘年至此復何爲著書不直一盃
水看鏡空添千縷絲達宦獨驕儒作戲後生速化吏
爲師有冠當掛無餘說但恨衰翁見事遲

午睡起消搖園中因登山麓薄莫乃歸

老病攻百骸微纏困束縛頽然一熟睡如獲萬金藥
窗明竹影亂林暖鳥聲樂灰深香欲上火活湯正作

毫甌羞茗芽銅洗供盥濯整巾出庭戶曳杖歷巖壑
遙岑見木杪細水齧籬脚踟躇遂忘歸清嘯送日落

羣兒

野行遇羣兒呼笑運甓忙共爲小浮圖嶙峋當道旁
蜺殼以注燈碗足以焚香須臾一鬨散無益亦何傷
古來富貴人峨冠登廟堂謀謨一悖謬縣宇失太康
坐令安業民血喋而屍僵傳呼一朝寵遺患日月長
均爲兒戲爾禍機孰深藏我作羣兒詩持用砭世盲
久疾灼艾小愈晚出門外

老境侵凌病滿軀火攻下策得枝梧沽來村酒初判
醉叱去山童不遣扶霜重木凋鴉可數溪清魚見鸛
相呼興闌却掩齋扉臥閑看青燈照藥爐

夙興弄筆偶書

憂患熏心少睡眠雞號窗白一欣然道旁歲晚貂裘
弊燈下書成鐵硯穿杜老慣聽兒索飯鄭公何啻客
無氈春風不解嫌貧病尚擬花前醉放顛

縱筆

山合水將窮真宜著放翁醉嫌天地迮老覺歲時公
偃蹇松逃世翩仙鶴駕風舊交零落盡一笑與誰同
冬晴閑步東村由故塘還舍作

故園三徑可婆娑遇興遵塗負杖歌霜重天寒山色
淡草枯野曠獵徒多解刀尚可謀黃犢揮帖無由致
白鵝自計長閑何所恨一生心事在煙波

又

紅藤拄杖獨相羊路遶東村小嶺傍水落枯萍黏蟹
椹鄉人植竹以取蟹謂之曰椹雲開寒日上魚梁洛陽二
頃言良是光範三書計本狂歷盡危機識天意要令
閑健返耕桑

十二月八日步至西村

臘月風和意已春時因散策過吾鄰草煙漠漠柴門
裏牛迹重重野水濱多病所須唯藥物差科未動是
閑人今朝佛粥更相餽更覺江村節物新

夜聞湖中漁歌

夢回一燈翳復明臥聞湖上漁歌聲嗚嗚乍低忽更
起嫋嫋欲斷還微縈初隨缺月墮煙浦已和殘角吹
江城悲傷似擊漸離筑忠憤如撫桓伊箏放臣萬里
憂國淚戍客白首懷鄉情峽猿失侶方獨宿沙雁垂
翅猶遐征巴巫竹枝短亭晚瀟湘欸乃孤舟橫世間
此恨故相似使我百感何由平

忽得京書有感

白髮蒼顏七十翁朽株枯木略相同如山儲藥難醫
拙齊斗堆金不換窮昨夢已拋空却外殘年全付醉
眠中故人苦未知心事一紙空煩寄斷鴻

晚步門外書觸目

數椽茆屋鏡湖傍喬木蒼煙一徑長酒賤過門多醉
叟天寒棲畝有餘糧歌呼草市知人樂簫鼓叢祠喜
歲穰只道老來詩思盡未妨擊壤頌時康
親舊書來多問近況以詩答之

耐辱推頽百不能居然老病住菴僧流年速似一彈指更事多於三折肱庭樹影中聞夜汲隣機聲裏對寒燈沈詩任筆俱忘盡酒戶新來却少增

開書篋見韓无咎書有感

老覺人間萬事非幽棲幸已脫塵鞿殘年得飽不啻足舊友半空誰與歸開眼不妨成一夢翦翎何至羨羣飛龍圖老子今安在把卷燈前淚滿衣

夜大雪歌

朔風吹雪飛萬里三更簌簌鳴窗紙初疑天女下散花復恐麻姑行擲米異哉凍硯已生冰信矣重衾如潑水山中臥澗松竹折庭前蔽地烏鳶死昨日之暖殊昏昏桃李欲圻春滿園陰陽錯繆世或有物窮則變古所言雖云明年幸一麥凍餒溝壑知誰存嗚呼今夕之雪未足論所憂明日巉崕高塞門

寄宇文成州

成州太守比何如夢裏依然把臂初復起卿當用卿

法長閑吾實愛吾廬五湖風雨孤舟夜萬里關山一
紙書正使兩翁長隔闕子孫它日莫相疎

示子聿

我鑽故紙似癡蠅汝復孳孳不少懲父子更兼師友
分夜深常共短檠燈

雪

平郊漫漫覺天低況復寒雲結慘悽老子方驚飛蛺
蝶羣兒已說聚後貌中宵鳶墮頻摧木徹日雞瘖重
壓棲只待新晴梅塢去青鞵未怯踏春泥

夜坐

耿耿殘燈夜未央負牆閑對篆盤香風號東北河冰
合月落西南竹影長孤鶻欲棲頻繞樹寒龜無息穩
搯床頽然坐睡那知曉推戶朝曦已滿廊

春雨

午夜聽春雨發生端及期世憂殊未艾天意固難知
士節承平日人材南渡時後生聞見狹撫枕歎吾衰

一 珍傲宋版印
夢與數客劇飲或請賦詩予已大醉縱筆書一
絕覺而錄之

高談雄辯憑陵酒豪竹哀絲蹴踖春占斷名園排日
醉不教虛作太平人

世事

世事說來猶可厭宦情夢裏亦應無山林已結三生
願朝市誰非九折途醉舞盃盤無藉在狂吟風月不
枝梧何人今擅丹青藝爲畫蘇門長嘯圖

二子

兩楹夢後少真儒毀譽徒勞豈識渠孟子無功如管
仲楊雄有賦似相如敬王事業知誰繼準易工夫故
不疎孤學背時空絕歎白頭窮巷抱遺書

謝郭希呂送石洞酒

從事今朝真到齊春和盎盎却秋淒色如夷甫玉麈
尾價敵茂陵金褭蹏瑞露頗疑名太過橐泉猶恨韻
差低山園雪後梅花動一榼常須手自攜 瑞露桂盃酒

得名甚盛橐泉岐下酒自昔各冠關中而失之太勁

飲酒

六十四民安在哉千八百國俱煙埃世人一漚寄巨
海對酒不醉吁可哀平生清狂今白首芒屨布裘稱
野叟晨興窗几網蛛絲石洞書來餉名酒看月直到
無月時尋花直到花片飛醉中往往花壓帽鄰里聚
看湖邊歸先生兩耳不須洗利名不到先生耳狂歌
起舞君勿嘲青山白雲終醉死

無題

金鞭朱彈憶春遊萬里橋東晝畫樓夢情曉風吹不
去書憑春雁寄無由鏡中顏鬢今如此幙下朋儔好
在不篋有吳牋三萬箇擬將細字寫新愁

雨雪兼旬有賦

冬溫思雨雪稍久已復厭祁寒人怨咨千載語猶驗
人心自無常天命本不僭積陰勢已極浮雲會當斂
山花紅酣酣谿水綠灩灩短蓬倘可具與子東入剡

北窗睡起

違物離人不計年，萬金難買北窗眠。
高懷元在羲皇上，大事已明空却前。
樵路細盤雲外嶺，釣筒倒插水中天。
此時消息君知否，千載巢由未足賢。

立春

紹熙又見四番春，春日春盤節物新。
獨酌二三盃愁對影，例添一歲老催人。
菊芽冒土如爭出，柳色搖村已漸勻。
身是蘭亭山下客，未容逸少擅清真。

曉枕

殘漏寥寥急明星，磊磊高一從安枕臥。
無復攬衣勞熨斗，生晨火熏籠覆緼袍。
一盃山藥酒，紅日滿亭臬落梅。

雪虐風饕愈凜然，花中氣節最高堅。
過時自合飄零去，恥向東君更乞憐。

又

醉折殘梅一兩枝，不妨桃李自逢時。
向來冰雪凝巖

地力斡春回竟是誰

閑居無客所與度日筆硯紙墨而已戲作長句

水複山重客到稀文房四士獨相依黃金那得與齊
價白首自應同告歸韞玉面凹觀墨聚浣花理膩覺
豪飛韞玉淄硯名浣花蜀牋名興闌却欲燒香睡閑聽松
聲晝掩扉

壬子除夕

前村後村燎火明東家西家爆竹聲老逢新正幸強
健却視徂歲何崢嶸兒時祝身願事主談笑可使中
原清豈知一出踐憂患斂縮豈復希功名雪霜滿鬢
覺死近節物到眼空歎驚蠶官社公正暖熱春盤儺
鼓爭施行蓬門車馬所不至山僧野叟相逢迎嗚呼
吾曹見事晚古俗實在蚩蚩氓苴簷一笑語兒子明
當滿舉屠蘇觥

癸丑正月二日

朱顏不老畫中人綠酒追歡夢裏身堪笑三山衰病

叟閉門寂寂過新春

又

菊叢抽綠滿枯荻繞舍梅花已遍開
須信今春春事早江鄉開歲有犇雷

避世行

君渴未嘗飲鳩羽君飢未嘗食烏喙
惟其知之審取捨不待議有眼看
青天對客實少味有口啖松柏火
食太多事作官蓄妻孥陷穽安所
避刀鋸與鼎鑊孰匪君自致欲求
人迹不到處忘形麋鹿與俱逝杳
杳白雲青嶂間千歲巢居常避世

稽山農

余作避世行以爲不可常也復作此篇

華胥氏之國可以卜吾居無懷氏之民可以爲吾友
眼如巖電不看人腹似鴟夷惟貯酒周公禮樂寂不
傳司馬兵法亡亦久賴有神農之學存至今扶犁近
可師野叟粗繒大布以禦冬黃梁黑黍身自春園畦
翦韭勝肉美社瓮撥醅如粥醲安得天下常年豐老

死不見傳邊烽利名畫斷莫挂口子孫世作稽山農
牧牛兒

南村牧牛兒赤脚踏牛立衣穿江風冷笠敗山雨急
長陂望若遠隘巷忽相及兒歸牛入欄煙火茆簷溼
讀書未終卷而睡有感

莫年緣一懶百事俱棄置今遂懶到書把卷輒坐睡
其餘懶則已感此獨歔歎念昔少壯時日夜痛磨礪
誓言死爲期身在敢暴棄寧知未死前殆欲負此志
顏回稱好學楊雄乃識字勉哉慕前修自畫聖所諱
早春新晴

柳弄春柔拂小潭山橫霽色卷浮嵐飛揚旛脚擲東
北零落梅花餘二三村店疎燈新賣酒神祠疊鼓正
祈蠶幽人睡起東園去芹茁萱芽又滿籃

枕上聞禽聲

屏掩輕寒酒半消斷香殘夢兩無膠開年春意遽如
許破曉一聲娑餅焦

感舊

憶從南鄭入成都氣俗豪華海內無
故苑燕開車載酒名姬舞罷斗量珠
浣花江路青螭舫槎柳球場白雪駒
回首壯遊真昨夢一竿風月老南湖

夜雨

澤國寒多雨畸人夜少眠不緣醒作病
只合醉終年庭艸已爭茁園梅空自憐
重雲不難扶無劍倚青天

又

寒雨連三夕幽居只數椽家貧輕過節
身老怯增年日月悲歌裏關山淚眼邊
梅花自開落歎息爲誰妍

又

人日春猶淺雞晨夜向闌殘缸燈暈小
單枕雨聲寒難補皇天漏空思后土乾
山家尊酒薄懷抱若爲寬

初晴野步

入市路三義緣山港半斜疎籬帶殘雪
幽竇瀉湍沙好鳥晴相語芳蘭暝欲芽
病餘無脚力隨處憩人家

明日復雨排悶

湖上孤村冷欲冰更堪衰與病相乘夢回點滴簷間
雨心折青熒帳外燈雖有數椽常似客僅存一肉未
成僧披衣偶取南華讀打破愁城喜不勝

又

此老在家如出家蒲團趺坐讀南華溼雲不散雁呼
伴幽室無聲燈墜花心法先當破窠窟世緣最忌養
萌芽行年七十方知悔萬事無涯生有涯

小室

小室僅容膝焚香觀昨非出門寧有礙知我正須希
霜橘爭棋樂仙壺賣藥歸平生釣竿手不解叩黃扉
浮世

浮世如流水滔滔日夜東百年均夢寐萬古一虛空
青鳥來雲外銅駝臥棘中相逢惟痛飲令我憶無功

紅梅

苧蘿山下越谿女戲作長安時世妝白白朱朱雖小

異斷知不是百花香

又

雲裏溪頭已占春小園又試晚妝新放翁老去風情
在惱得梅花醉似人

湖上

今朝雨初晴湖上好天色落梅紛可藉桑柳亦已拆
老夫病良已竝水散輕策冉冉春物新忽忽衰髮白
四方豈不樂懶惰畏遠客惟當勤買酒東城復南陌

晴甫一日復大風雨連日不止遣懷

書劍當年隘九州白頭歸臥一窗幽染成草色春猶
淺老盡梅花雨未休得句已無前輩賞開編時與古
人遊山房小甕今朝熟不恨尊前自獻酬

癸丑上元三夕皆大雨雪

雨雪連三日孤城冷欲冰泥深唯響屐風惡更吹燈
空惱追歡客何關在定僧一盃嘗豉煎寒影對峻嶒

寓歎

人生各自有窮通，世事寧論拙與工。
裹馬革心空許國，不龜手藥却成功。
早朝玉勒千門雪，夜坐蓬窗萬壑風。
借得奇書且勤讀，小兒能續地爐紅。
子坦以新昌木炭二百斤來

幽興

雨後梅花無復在，老來酒盞頓成疎。
身如海燕不逢社，家似瓜牛僅有廬。
短髮垂肩懶中散，深居謝客病相如。
從今何以消長日，剩種芭蕉學草書。

細梅

疎影橫斜事已非，小園日莫鎖芳菲。
素綃應怯東風思，故著重重淺色衣。

又

香似海沉黃似酒，不禁風雪最遲開。
放翁欲作梅花譜，蠟屐檣笻日日來。

又

紅梅眼看風吹盡，更有細梅亦已無。
天與色香天自

愛不教一點上蜂鬚

又

結廬溪澗清成日
香心清淨黃
不與風塵
其餘始并
蘇并

又

思始
重
對
詩
交

又

昨收猶存何以
醉吳日
陳對
芭蕉
學草書

出家
助
瓜
十
動
育
蠶
絲
漫
垂
風
戲
中
精
利
吳
岳
樓
空
雨

雨
對
斜
清
燕
剪
去
未
來
配
香
餅
如
刺
使
吹
強
不
能
不
能

又

木
送
二
百
代
來
一
元
二
文
皆
大
雨
雪

春
風
甜
香
音
書
且
慎
前
不
與
指
點
似
歡
球
不
成
以
國
語

劍南詩稿卷第二十六終

工
真
無
草
少
空
在

劍南詩稿目錄
卷第二十七

僧廬 春日 春遊 懷昔 記夢 春陰

睡起行至門外有賦 早春四首 醉吟三首

贈劉改之秀才 蓬門 龍鍾 送佛照光

老赴徑山 春社有感 春社四首 村夜

山園遣興 次韻陳機宜見贈 野意 戒殺

余年四十六入峽忽復二十三年感懷賦長

句 山行 雨中排悶 杜敬叔寓僧舍開軒

松下以虛瀨名之來求詩 贈徑山鈺書記

五月一日作 春夏之交衰病相仍過芒種始

健戲作 自嗟 枕上述夢 雨中排悶 小

軒夏夜涼甚偶得長句呈杜叔高秀才 憶昔

夏日晚興 老翁 困甚戲書 歲晚 戲

詠山陰風物 老健 六月晦日作 喜雨

門外納涼 贈蘇趙叟兄弟 癸丑七夕 共

語 書歎 秋曉倚闌 癸丑七月二十七夜

夢遊華嶽廟二首 僕頃在征西大幕登高望

關輔樂之每冀王師拓定得卜居焉暇日記此

意以示子孫 讀陶詩 秋夜感舊十二韻

幽居 醉題 雨涼小飲戲作 題齋壁 書

憤 秋興 雨夜排悶二首 秋日出遊戲作

二首 雨中夕食戲作三首 自警 寄方瞳胡

先生 雨夕焚香 秋雨初霽徙倚門外有作

雨中作 贈老雞二首 秋晚閑步隣曲以

予近嘗臥病皆欣然迎勞 雨夜 醉臥道傍

枕上聞急雨二首 得趙若川書因寄 夢

至洛中觀牡丹繁麗溢目覺而有賦 閑居對

食書媿二首 秋夜獨酌 風雲交作戲題

自嘲 書室 數日秋氣已深清坐無酒戲題

長句 五更起坐 谿上雜言 厭事 方池

癸丑重九登山亭追懷頃在興元常以是日

獵中梁山山下樂甚慨然賦詩予于是生六十有九年矣

宋陸游務觀

...

...

...

...

...

...

...

...

劍南詩稿卷第二十七

宋陸游務觀

僧廬

僧廬土木塗金碧四出徵求如羽檄富商豪吏多厚積宜其棄金如瓦礫貧民妻子半菽食一飢轉作溝中瘠賦斂鞭笞縣庭赤持以與僧亦不惜古者養民如養兒勸相農事憂其飢露臺百金止不爲尚媿七月周公詩流俗紛紛豈知此熟視創殘謂當爾傑屋大像無時止安得疲民免飢死

春日

節節足足雀噪檐朱朱白白花窺簾坐旁設酒隨時飲床上堆書信手拈寓世無求猶役役杜門不病亦厭厭春濃日永有佳處睡味著人如蜜甜

春遊

鏡湖春遊甲吳越鶯花如海城南陌十里笙歌聲不
絕不待清明寒食節青絲玉瓶挈新釀細柳穿魚初
出浪花外金羈絡雪駒橋邊翠幙圍螭舫怕雨愁陰
人未知時時微雨却相宜養花天色君須記正在輕
雲嫩靄時

懷昔

昔遇高皇帝華纓接俊遊年光一彈指世事幾浮漚
故國但青嶂羈臣今白頭平生笑李廣癡絕望封侯

記夢

夢不出心境曠然成遠遊花殘杜城醉木落華山秋
戰血磨長劍塵痕洗故裘那知覺來處身臥五湖舟
春陰

老境二年病新春十日陰孤舟鏡湖客萬里玉關心
出岫雲多態呼風鳥獨吟讀書惟恐盡傾酒却愁深

睡起行至門外有賦

窗黑停書課屏深養病眸雨聲工破睡酒力不禁愁

兀兀披衣起昏昏曳杖遊柴荆晚未閉隔水數歸牛
早春

舊學樊遲稼新通汎勝書不成籌國論且復愛吾廬

又

具牛將犢行野雉挾雌鳴農事不可緩閑人亦勸耕

又

近陂牛渾白遠浦鴨頭青一櫂悠然去東風吹酒醒

又

西村一抹煙柳弱小桃妍要識春風處先生拄杖前

醉吟

少日沉迷汗簡青如今毀譽兩冥冥書生弄筆如何
信只合花前醉不醒

又

驅使難憑赤丁子傳呼底用蒼頭兒世間如夢身如

寄春去花空欲泥誰

又

牽經引禮人誰聽是古非今世共憎何似對花傾綠
酒自歌一曲醉騰騰

贈劉改之秀才

君居古荊州醉膽天宇小尚不拜龐公况肯依劉表
胸中九淵蛟龍蟠筆底六月冰雹寒有時大叫脫烏
幘不怕酒盃如海寬放翁七十病欲死相逢尚能刮
眼看李廣不生楚漢間封侯萬戶宜其難

蓬門

莫笑蓬門雀可羅老農正要養天和穿林裊裊孫登
嘯叩角鳴鳴甯戚歌睡美到明三展轉飢甘捧腹一
摩挲床頭更聽糟床注造物私吾亦已多

龍鍾

龍鍾一老寄荒村鼎食山棲久已分平日氣吞雲夢
澤莫年緣在武夷君搶榆敢羨垂天翼倚市從嗤刺
繡文幸有筆床茶竈在孤舟更入剡谿雲

送佛照光老赴徑山

大覺住育王拗折拄杖強到底佛照住育王挑得鉢
囊隨詔起從來宗門話只要句不死說同說異菴外
人若是吾宗寧有此日日風雨今日晴萬里春光入
帝城傳宣江上走中使開堂座下羅公卿御香靄靄
雲共布法音浩浩潮收聲報恩一句作麼道常遣山
林見太平

春社有感

顛顛前朝白髮郎祠庭賦祿玷恩光寸心未與年俱
老萬事惟憑酒暫忘穿仗兩曾觀揖遜扶犁獨幸返
耕桑耆年凋落還堪嘆社飲推排冠一鄉三山百家之
聚年莫余先者

春社

桑眼初開麥正青勃姑聲裏雨冥冥今朝有喜君知
否到處人家醉不醒

又

社肉如林社酒濃鄉鄰羅拜祝年豐太平氣象吾能

說盡在鼔鼔社鼓中

又

柴門西畔枕陂塘社雨新添一尺強臺省諸公方袞袞故應分喜到耕桑

又

太平處處是優場社日兒童喜欲狂且看參軍喚蒼鷺京都新禁舞齋郎

村夜

寂寂山村夜悠然醉倚門月昏天有暈風軟水無痕迹爲遭讒遠身由不仕尊敢嗟車馬絕同社自雞豚

山園遣興

輸逋告糴走比隣恤患分災累故人安得此身無一事林中數筍過殘春

次韻陳機宜見贈

邂逅今年得若人脩然不染庾公塵思幽屈子歌山鬼語妙陳王賦洛神初接笑談忘老憊熟觀風度愛

清真花時飛盡頻行樂莫學衰翁睡過春

野意

隄長逾十里村小只三家山客弛樵擔溪翁鳴釣車
花深迷蝶夢雨急散蜂衙衰疾新年減青鞵上若耶

戒殺

物生天地間同此一太虛林林各自植但坐形骸拘
日夜相殘殺曾不置斯須皮毛備裘褐膏血資甘腴
雞鶩羊彘輩尚食稗與芻飛潛何預汝禍乃及禽魚
豺虎之害人亦爲飢所驅汝顧不自省何暇議彼歟
又于人類中各私六尺軀方其忿怒時流血視若無
我欲反其源默觀受氣初挺刃之所加慘若在我膚
朝飯一鬴豆莫飯一盃蔬捫腹茹簷下陶然歡有餘

余年四十六入峽忽復二十三年感懷賦長句
當年吊古巴東峽雪灑扁舟見早梅宋玉宅邊新酒
美巫山廟下莫猿哀樵柯爛盡棋方劇客甑炊成夢
未回已把癡頑敵憂患不勞團扇念寒灰 劉夢得團扇

歌曰當時初入君懷袖豈念寒爐有死灰

山行

七十衰翁短鬢斑藥瓢藤杖伴清閑平生惡路羊腸
阪晚歲羸軀飯顆山一寸塔餘青靄外數聲鐘下翠
微間往來處處皆奇絕莫道先生興盡還

雨中排悶

一春苦沈陰未省見桃李已逢暗寒食更值雨甲子
重雲失南山寸步困泥滓籜龍已鱗鱗一飽差可喜

杜敬叔寓僧舍開軒松下以虛瀨名之來求詩
君不見見洛陽八節灘未至一舍聞驚湍生綃六幅誰
所畫入眼能令三伏寒又不見桐廬七里瀨濺雪跳
珠舞澎湃羊裘老子去千年絕世孤風凜如在杜陵
之孫今勝流飄然不必事遠遊結茆古寺聽松吹坐
擅洛水桐江秋放翁百念俱已矣獨有好奇心未死
約君少待秋月明抱琴來宿寫灘聲

贈徑山鈺書記

徑山老將無勅敵百萬魔軍俱掃迹座下何人策雋
功籌略縱橫銛記室銛公聲名滿吳會惟有放翁最
先識奕奕揮毫王粲詩翩翩插羽陳琳檄風雷東海
起伏龍縑藉園丘薦蒼壁徑山入門第一義萬口誦
言真稱職我謂銛公豈止此徑山鉢袋渠能得一枝
白拂倘付之會見青天飛霹靂

五月一日作

處處稻分秧家家麥上場敢悲身老大獨幸歲豐穰
酪美朱櫻熟菰青角黍香翛然一竹几飽受北窗涼
春夏之交衰病相仍過芒種始健戲作

藥裏關心百不知可憐筆硯鎖蛛絲倒壺猶有莫春
酒開卷遂無初夏詩戶外逢人驚隔闕燈前顧影嘆
支離癡頑未伏常愁臥鼓缶長謠樂聖時

自嗟

青蔬半畝老生涯霜鬢蕭蕭只自嗟勛業蹉跎空許
國文詞淺俗不名家殘骸皆作麒麟棺舊友仍非處

士牙收得平生釣竿手長安西日更須遮

枕上迷夢 五月十二日雞鳴時作

江湖送老一漁舟清夢猶成塞上游生馬駒馳鐵蹏
腕古鏡歌奏錦衣禱玉關雪急傳烽火青海雲開見
戍樓白首不侯非所恨咿嚶床簀死堪羞

雨中排悶

潤入盆山綠葉稠倦攤書帙小窗幽浮雲不卷時時
雨薄酒無功日日愁積潦漲來妨躡屐好山遮盡罷

登樓青秧搖蕩湖堤決一飽前知未易謀

小軒夏夜涼甚偶得長句呈杜叔高秀才

遙夜簾櫳已借秋闌干星斗挂檐頭鵲翻清影移枝
宿螢弄孤光拂簟流榻上琴書紛枕籍髮根風露冷
颼颼故人莫笑幽居陋此夕真從造物遊

憶昔

憶昔西征日飛騰尚少年軍書插鳥羽戍壘候狼煙
渭水秋風夜岐山曉雪天金鞵馳叱撥繡袂舞嬋娟

但恨功名晚寧知老病纏虎頭空有相麟閣竟無緣
壯士埋巴峽獨孤策孤身臥海壩安西九千里孫武
十三篇裘嘆蘇秦弊鞭憂祖逖先何時聞詔下遣將
入幽燕

夏日晚興

高掛虛窗對綠池鳥啼聲歇柳陰移含風珍簟閑眠
處疊雪輕衫新浴時泉冷甘瓜開碧玉手香素藕罨
一作雪長絲夕陽四面漁歌起又赴隣翁把釣期

老翁

老翁垂七十不復歎頭顱浩蕩新漁艇凋零舊酒徒
巖徐元袞袞管葛亦區區獨有欣然處登山未用扶
困甚戲書

官如枝頭乾不受雨露恩身如水上浮泛泛寧有根
刈茆以苫屋縛柴以爲門故人分祿米隣父餉魚殮
前門吏徵租後門質襦幘不敢謀歲月且復支朝昏
雨餘幽花拆亦可侑清尊吾生信已乎終老此山村

歲晚

日月忽其逝吾生猶幾何不從屠狗醉卽和飯牛歌
斧鉞稽天討金縉約虜和無情恨荆棘歲晚暗銅駝
戲詠山陰風物

萬里秦吳稅駕遲還鄉已歎鬢成絲城邊綠樹山陰
道水際朱扉夏禹祠項里楊梅鹽可徹 太白梁園吟云
玉盤楊梅爲君設吳鹽如花皎白雪不知楊梅酸者乃薦以鹽佳品未
嘗用也 湘湖蓴菜豉偏宜 蓴菜最宜鹽豉所謂未下鹽豉者
言下鹽豉則非羊酪可敵蓋盛言蓴羹之美爾 圖經草草常堪
恨好事它年采此詩

老健

才智不足狂有餘此身老健更誰如齒牢尚可決乾
肉目瞭未妨觀細書不怪模稜嗤了了但驚紵臂勸
徐徐曉看瓜壟初牽蔓一笑呼兒勿廢鋤

六月晦日作

長夏忽云過徂年行且休川原方渴雨草木已驚秋

露蔓晨猶泫風蟬莫更道明窗對清鏡世事判悠悠
喜雨

雷車隆隆南山陽電光煜煜北斗傍急雨橫斜生土
香草木蘇醒起仆僵芭蕉抽心鳳尾長薜荔引蔓龍
鱗蒼葛憫竹簟夜更涼超然真欲無羲皇常年七月
蚊殷廊今夕肅肅疑飛霜水車罷踏屣斗藏家家買
酒歌時康

門外納涼

玄雲障落日早得數刻涼寒泉灑門前浴罷倚胡床
蟬聲晚愈壯藕花凋更香嘯詠忽已久野色來蒼蒼
新月淡無輝大星森有芒水鳥亦歸宿飛鳴掠橫塘
人生各有時何至終身忙撫髀三太息墜露溼衣裳

贈蘇趙叟兄弟

君家真德門才傑生衮衮託契則甚深所恨相識晚
攜文數過我每讀必三反譬如天廐駒真是渥洼產
閉門萬卷讀更要極源本才難聖所嘆期子敢不遠

癸丑七夕

風露中庭十丈寬，天河仰視白漫漫。難尋仙客乘槎路，且伴吾兒乞巧盤。秋早時聞桐葉墜，夜涼已怯紵衣單。民無餘力年多惡，退士私憂實萬端。

共語

喬嶽成塵巨海枯，欲求共語一人無。黃金已作飛煙去，癡漢終身守藥鑪。

書歎

少年志欲掃胡塵，至老寧知不少伸。覽鏡已悲身潦倒，橫戈空覺膽輪囷。生無鮑叔能知己，死有要離與卜鄰。西望不須揩病眼，長安冠劍幾番新。

秋曉倚闌

雲罇纖纖玉一鉤，小庭風露更清柔。老來朋舊凋零盡，獨倚闌干特地愁。

癸丑七月二十七夜夢遊華嶽廟

驛樹秋風急，關城暮角悲。平生忠憤意，來拜華山祠。

又

牲碑僞正朔祠祝虜衣冠神亦豈堪此出門山雨寒
僕頃在征西大幕登高望關輔樂之每冀王師
拓定得卜居焉暇日記此意以示子孫

八月殘暑退秋聲滿庭樹豈無四方志衰病迫霜露
遼東黃頭奴稔惡天震怒南北會當一老我悲不遇
子孫勉西遷俗厚吾所慕約己收孤嫠教子立門戶
黍稷暗阡陌鷄雉足七箸永爲河渭民勿憚關山路

讀陶詩

我詩慕淵明恨不造其微退歸亦已晚飲酒或庶幾
雨餘鋤瓜壟月下坐釣磯千載無斯人吾將誰與歸

秋夜感舊十二韻

冷螢綴蓬根忽復照高樹年光逝不留百感集遲莫
往者秦蜀間慷慨事征戍猿啼鬼迷店馬噤飛石鋪
鬼迷店在大散關下飛石鋪在小益道中常有崩石危嶺高入雲
朽棧劣容步天近星宿大江惡蛟鼉怒意氣頗自奇

性命那復顧最懷清渭上衝雪夜掠渡封侯細事爾
所冀垂竹素兜鍪竟何成豈獨儒冠誤當時妄校尉
旗纛今照路浩歌遂成章聊慰老不遇

幽居

海滋結茆新退藏常畏人已侵垂老境尚愛不貲身
丹灶長生藥巢居上古民秋來有奇事鷗鷺日相親

醉題

勿笑山翁病滿軀胸中俠氣未全無雙瞳遇醉猶如
電五木隨呼盡作盧代北胡兒富羊馬江南奇士出
菰蘆何由親奉平戎詔蹴踏關中建帝都

雨涼小飲戲作

孤村小院雨輪涼團扇流塵篔簹避床蛩思感秋吟壞
壁螢光乘暗遶高梁巾箱字細成褫嬾醺醪盃深斷
送狂坐睡覺來人已散簾櫳時度玉簪香 玉簪花名

題齋壁

迹是滄浪客家居穉稭村秋菰莖羹滑社酒帶醅渾

勲業知難遂文章不更論惟餘此身在分付與乾坤
書憤

山河自古有乖分京洛腥羶實未聞劇盜曾從宗父
命遺民猶望岳家軍上天悔禍終平虜公道何人肯
散羣白首自知疎報國尚憑精意祝爐熏宗澤守東都
巨盜來歸百萬號宗爺岳家軍蓋紹興初語

秋興

秋風又滿會稽城有客飄然萬事輕久向林間得佳
趣不知身外有浮名蒲萄雨足初全紫烏柏霜前已
半頰欲把一盃終覺懶老來懷抱爲誰傾

雨夜排悶

羸病愁燈影羈懷怯雨聲新秋忽已半垂老若爲情
金印兒嬉事青編身後名何如破窗下袖手送餘生
又

村巷時時雨江城夜夜砧沉憂羈客夢孤憤遠臣心
身病常須藥囊空未贖琴明朝鏡中髮飽受雪霜侵

秋日出遊戲作

箬帽蓑衣自道宜
不論晴雨著無時
半醒半醉人爭看
是聖是凡誰得知

金中又

薄雲韜日未成
雨野水齧沙爭
赴溪書冊懶看
聊作伴酒壺不飲亦常攜

雨中夕食戲作

高秋滴堦雨作泥
黃昏爭林雀欲棲
臨窗一飯頗簡快
半升脫粟澆黃齏

又興

粗飢寒蒞到手空
屬饜也與八珍同
家人見慣渾閑事
笑殺新來兩髻童

又

粳粒微紅愧食珍
蔣芽初白喜嘗新
摩挲便腹無憂責
我是人間得計人

自警

墮髮滿晨梳荒畦入晚鉏涼生團扇陋病退短筇疎
聖道功殊淺塵緣習未除青燈幸如故勉近讀殘書

寄方瞳胡先生

形槁神彌王心虛腦自凝平生一酒榼萬里兩行滕
安枕存玄牝齋居養絳陵他年喬嶽下正晝看飛騰
古仙人飛升皆在五嶽名山故人少見者

雨夕焚香

芭蕉葉上雨催涼蟋蟀聲中夜漸長繙十二經真太
漫與君共此一爐香

秋雨初霽徙倚門外有作

三十餘年此結廬客來不用笑迂疎前身已預蘭亭
會老眼曾窺禹穴書浮盃社醅香出屋登場秋稼穗
盈車蕭蕭蓬鬢雖衰矣追逐鄉鄰尚有餘

雨中作

野外偏于看雨宜映空渡水細如絲川雲借潤支琴
石澗水分流洗藥池未肯高眠成老態却緣危坐得

新詩悠然更助鄰丁喜漸近收蕎下麥時

贈老雞

峩峩赤幘先羣輩喔喔長鳴蓋四郊意氣雖雄無處用風霜從我老衡茆

又

場中啄粟樹頭棲三唱明星出尚低關路元無孟嘗客吳兒莫議會稽雞

秋晚閑步隣曲以予近嘗臥病皆欣然迎勞

放翁病起出門行績女窺籬牧豎迎酒似粥釀知社到甦如盤大喜秋成歸來早覺人情好對此彌將世事輕紅樹青山只如昨長安拜免幾公卿

雨夜

歲晚茆茨劣自容齒搖將脫髮將童心遊萬里關河外身臥一窗風雨中醫不可招惟忍病書猶能讀足忘窮夜闌睡覺蛩聲裏時見燈花落碎紅

醉臥道傍

爛醉今朝臥道傍，鄉閭共爲護牛羊。
高懷那遣羣兒覺，至理真能萬事忘。
喚起瘦軀猶鬼我，扶歸困睫更
芒洋。凍齏快嚼，茆簷下拍手從人笑。
老狂
枕上聞急雨

枕上雨聲如許奇，殘荷叢竹共催詩。
喚回二十三年夢，燈火雲安驛裏時。

又

酒病羈愁一洗空，長歌高枕雨聲中。
傳聞谿港深三尺，明日扁舟處處通。
港涸久不通，舟楫兩日雨，殊可喜也。
得趙若川書因寄

澤居路絕人不到，晨起忽傳雙鯉魚。
儲淚一升悲世事，減愁三尺看君書。
龍墀對策言傷直，山邑迎親計未疎。
老病閉門誰省錄，因風時肯問何如。
夢至洛中觀牡丹繁麗，溢目覺而有賦

兩京初駕小羊車，顛顛江湖歲月賒。
老去已忘天下事，夢中猶看洛陽花。
妖魂豔骨千年在，朱彈金鞭一

笑譁寄語旣裘莫癡絕祈連還汝舊風沙

閑居對食書媿

遊宦無功坐免歸誰令盤筋極甘肥錦鱗差尾魚登
俎繡羽駢頭雉觸機桑落滿壺春盎盎雨前轉磴雪
霏霏殘年何地酬君賜自古羈臣厭蕨薇

又

老病家居幸歲穰味兼南北飫枯腸滿脾蜜熟餗
餗美下棧羊肥罇飴香鱖刺河魴初出水迷離穴兔正
迎霜山僧一鉢無餘念應笑先生爲口忙

秋夜獨酌

壯志隨年減羈愁與夜長月高寒暈淡花坼露叢香
仕畏讒銷骨歸判酒腐腸青燈寫孤影相勸盡餘觴
風雲交作戲題

雲脚如龍爪空中挾雨來何關風伯事欲到却吹回

自嘲

歲月推遷萬事非放翁可笑白頭癡此生竟出古人

下有志尚如年少時僻學固應知者少長歌莫問和
予誰自嘲自解君毋怪老大從人百不宜

書室

客來莫笑席塵凝靜處工夫却少增黑蟻常繙魯壁
簡瘦蛟時落越溪藤尚能豪健如霜鷗未遽衰殘學
凍蠅更喜論文有兒子夜窗相對短檠燈

數日秋氣已深清坐無酒戲題長句

漸近重陽天氣嘉數椽茆竹淡生涯山童擁篲掃黃
葉鄰女傍籬收碧花避俗要生輪四角出門何啻路
三叉晚窗酒盡無多歎試問前村好事家

五更起坐

世間醉夢過浮生誰肯披衣坐五更煜煜心光回自
照縣縣踵息浩無聲古人得意捐糟粕癡子何知墮
化城七十老翁須努力隣雞纔唱又窗明

谿上雜言

谿上之丘吾可以休谿中之舟吾可以遊一裘雖弊

可度風雪虐一簞雖薄未有旦夕憂媿于此心鼎食
其敢飽負其所學蟬冕增吾羞古人誰謂不可見黃
卷猶能覩生面百穀粳粳知稷功九州茫茫開禹甸
巍巍成功亦何有治亂但如翻覆手逢時皆可致唐
虞比身管樂寧非苟樹桑釀酒蕃雞豚是中端有王
業存一朝遇合得施設千載始知吾道尊

厭事

厭事便微疾貪眠幸早寒人雖笑疎懶天實閔衰殘
韋布何曾賤茆茨本自寬黃花插烏帽一醉有餘歡

方池

莫笑方池小清泉數斛寬照花紅錦爛洗研黑蛟蟠
日取供茶鼎時來擲釣竿秋風過欄角也解作微瀾
癸丑重九登山亭追懷頃在興元常以是日獵
中梁山下山樂甚慨然賦詩予于是生六十有九

年矣

生年六十九重陽轍遍秦吳歲月長南鄭從戎嗟尚

壯中梁縱獵最難忘
離披雉拂雕鞍墮
獨倏狐穿古冢藏
夢斷酒醒今萬里
亦逢佳節重悲傷

劍南詩稿卷第二十七終

劍南詩稿目錄

卷第二十八

感懷四首

出遊二首

讀杜詩偶成

秋夜

卽事

物有可歎者因戲作數語以識之

老

懷對酒

東村散步有懷張漢州

晚寒自

東村步歸

排悶六首

初寒病中有感

放

歌行

山頭石

有客

幽居五首

野興四首

買油

繫舟二首

初冬至近村

古築城

曲四首

山園

將軍行

古別離

寄子虞

泛舟自中堰入湖

夜歸舟中作

蓬萊閣

聞大風

小出塞曲

冬日園中作

登山亭

拄杖歌

冬晴

冬夕二首

十月十五夜

對月

久疾三首

舍北望牛頭山山有延勝

寺先太傅書堂在焉六年前嘗泛小江往遊寺

焚於睦寇書堂無復存矣

十月十九日大風

作寒閉戶竟日

寄天封明老

村居二首

十月下旬暄甚戲作小詩
霜天雜興三首

連日風雨寒甚夜忽大風明日遂晴
懷昔

寄題王俊卿看山堂二首
絕歎 風雨 晚

過鄰曲
莫仲謙挽詞 病起 晚興 贈粉

鼻與兒輩論李杜韓柳文章偶成
夢至小

益懷紹興間往還諸公
磨衲道衣 溪上

作二首
自小憩 癸丑十一月下旬温燠如春

晦日忽大風作雪
占城櫻竹拄杖 西城

東城
斯道 病起 山居 日有幽事 戲作二首

蝸廬
山冬夜讀書二首 十二月九日枕上

作林記夢三首
鏡湖女

嘔事
謝曾回 樓香 因題 打樓 臨以 歸之

謝對四首
出按二首 黃耳 結語 效

卷第二十八
第一二五

劍南詩稿卷第二十八

宋陸游務觀

感懷

老病與世絕屏迹三家村我居一何陋舉手屋可捫
客至不能迎堅坐度朝昏一窗修竹下超然傲羲軒
外物自變遷內景常默存黃流不注海浩浩朝岷崙
妙道本自得至言初不煩功成出緒餘猶足康黎元

又

卜居鏡湖上一菴環翠屏竹林藏谿谷嶺路蟠青冥
騫騰立奇石嶄絕瞻危亭車馬雖掃迹猿鳥與忘形
我行半九州蹋盡芒屨青豈知雪滿鬢于茲敞雲扃
丹砂收箭鏃扶苓斲人形遼天渺歸鶴一瞬三千齡

又

平生喜栽花賴以娛寂寞小園財一畝粲粲萬跗萼

典衣買紫桂輟食致紅藥
阡眠香草茂掩苒煙柳弱
踏雨探花開障風畏花落
雖慚童心在終勝塵事縛
今日疾稍間天氣亦清廓
啼鳥寒不歸可以侑吾酌

又

殘年迫衰謝嬰疾歸鄉枌
諸賢渡江初總角幸有聞
才非楚倚相亦能讀典墳
夫豈或使之後死與斯文
世儒鑿戶牖道術將瓜分
孤陋守一說百氏殆可焚
後來豈無人鼻堊誰揮斤
巍巍貞觀治房魏出河汾

出遊

采藥今朝偶出遊溪邊小立
喚漁舟未須著句悲搖
落嫩日和風不似秋

又

朝行躡屩穿幽谷莫返褰裳
涉亂流提起短筇成一
笑每煩上座爲分憂

讀杜詩偶成

一念寧容事物侵天魔元自是知音
拾遺大欠修行

力小吏相輕尚動心

秋夜卽事

烏宿牛歸戶欲扃燈前老子影伶俜溼雲不散初聞
雁深竹微明尚有螢一卷舊書開蠹簡半升濁酒倒
餘瓶乘閑欲擬歸來作小草斜行滿曲屏
物有可歎者因戲作數語以識之

雞棲及我未掩扉犬雖遠出莫自歸司晨警夜職交
舉簸糠棄粒報亦微查查雙鵲更媿汝庭樹夜宿常
相依豈憐主人老寂寞暝熱蓬戶不忍違養鴟甚恩
健卽去養鷹雖久飽亦飛嗟哉物性厚薄異使我隱
几空獻歎

老懷

身見高皇再造初名場流輩略無餘舊書科斗纔存
字薄業蝸牛僅有廬迂士豈堪新貴使少年自與老
人疎荒園寂寂堆霜葉抱瓮何妨日灌蔬

對酒

古今共有死長短無百年方其欲瞑時如困得熟眠
世以生時心妄度死者情疑其不忍去一笑可絕纓
區區計生死不如持一觴一觴澆不平萬事俱可忘
待酒忘萬事猶是役於酒醉醒不到處天魔自奔走

東村散步有懷張漢州

扶杖村東路秋來始此回寒鴉盤陣起野菊臥枝開
憂國丹心折懷人雪鬢催房湖八千里那得尺書來
晚寒自東村步歸

夕陽下平野落葉滿荒街村店賣麩麩人家燒豆豉
溪風透布褐草露溼芒屨骨相元如此何由與世諧
排悶

丈夫結髮志功名大事真當以死爭我昔駐車籌筆
驛孔明千載尚如生

又

曾攜一劍遠從戎秦趙關河顧盼中老去功名無復
夢凌煙分付黑頭公

又
四十從軍渭水邊功名無命氣猶全
白頭爛醉東吳市自拔長刃割屍肩

又

西塞山前吹笛聲曲終已過雒陽城
君能洗盡世間念何處樓臺無月明

又

萬里風中寄斷蓬古來虛死幾英雄
拔山力與回天勢不滿先生一笑中

又

風霜九月冷颼颼湖海飄然一布裘
親見宓義初晝卦轉頭三十萬春秋

初寒病中有感

楚水楓林霜露新白頭一叟正吟呻
牛衣未起王章疾馬磨何傷許靖貧
治道本來存簡冊神州誰與靜
煙塵新亭對泣猶稀見況覓夷吾一輩人

放歌行

君不見汾陽富貴近古無二十四考書中書又不見
慈明起自布衣中九十五日至三公人生窮達各有
命拂衣徑去猶差勝介推焚死終不悔梁鴻寄食吾
何病安用隨牒東復西獻諛耐辱希階梯初無公論
判涇渭徒使新貴矜雲泥稽山一老貧無食衣破履
穿面黧黑誰知快意舉世無南山之南北山北

山頭石

秋風萬木賈春雨百草生造物初何心時至自枯榮
惟有山頭石歲月浩莫測不知四時運常帶太古色
老翁一生居此山脚力欲盡猶躋攀時時撫石三歎
息安得此身如爾頑

有客

有客隱華山學道忘歲月靈苗生絕壁光景中夜發
斲根食之盡倏爾換金骨通籍虎豹闈日預通明謁
綠章奏封事誤字坐責罰後身幸不忘去日苦飄忽

白首三入朝未省及黔突方逃申公鉗已取木和剛
福微不盈皆罪衆幾擢髮上天豈憐之寸步使屢蹶
拔其利欲根還之山水窟洗心謝宿愆世事等胡粵

幽居

窮老苦畏事雅意在丘壑結茆鏡湖上卒歲安寂莫
有門常嬾開壁間挂雙屨猶恨未遠人靜夜聞城角

又

來客無僮奴剝啄自叩戶主人亦蕭然茗飲不能具
清言正絕倒日莫亟散去更欲盡所懷衣薄畏霜露

又

山園手栽花日夜數花時花開亦已落一歡自無期
勸君強自娛勿作兒女悲春風染柳條不染君鬢絲

又

種菜三四畦畜豚七八箇永言給賓祭且復課慵惰
霜清黃犢健土潤小雨過冬畊不可失努力勿安臥

又

放翁家山陰其貧蓋一國骨相異虎頭祠祿真鷄肋
有米薪未具坐待至曛黑躬耕豈所難一飽非爾力

野興

身似孤鴻鍛羽翰悲鳴飲啄住江干酒闌客思多新
感病起衰顏失故丹倦枕忽聞中夜雨疎砧又報一
年寒幽窗晤語無來客空倚詩情強自寬

又

老去癡頑百不能非醒非醉日騰騰敲門惟有徵租
吏好事元無送米僧舊俗不還誰復念古書雖在漸
難憑平生意氣今如此惆悵西窗半夜燈

又

殘水涓涓入野塘菊花猶放數枝黃悶思野步便晴
日病怯冬溫喜薄霜湯餅鬻成新兔美膾齏擣罷綠
橙香人間富貴如何得商略山林却味長

又

水作縠紋微起伏天如卵色半陰晴偶來竹下搯頭

坐却向藤陰曳杖行西埭人喧荻船過東村燈上緯
車鳴幽居應接真無暇莫訝經年嬾入城

買油

習氣年來掃未平夢回猶喜讀書聲冬裘不贖渾閑
事且爲吾兒續短檠

繫舟

繫舟江浦待潮平歎息無人共月明歷盡世間多少
事飄然依舊老書生

又

地曠月明鋪素練霜寒河淺拂輕綃手扶萬里天壇
杖夜過前村禹會橋

初冬至近村

南國霜常晚初冬葉始紅曠懷牛屋下美睡雨聲中
沮水憶浮馬西郵軍行溪過澗皆浮而濟
嶓山思射熊何

由効唐將八十下遼東

古築城曲

築城聲酸嘶漢月傍城低白骨若不掩高與長城齊

又

長城高際天二十萬人守一日詔書來扶蘇先授首

又

百丈築城身千步掘城壕咸陽三月火始悔此徒勞

又

嶧山訪秦碑斷裂無完筆惟有築城詞哀怨如當日

山園

山泉引派漲清池野蔓移根絡短籬藝果極知非老
事接花聊復効兒嬉提壺言語開顏聽斷木衣襦緩
步窺莫笑題詩還滿紙小園幽事要君知

將軍行

將軍入奏平燕策持笏榻前親指畫天山熱海在目
中下殿卽日名烜赫馳出都門雪初霽直過黃河冰
未拆繡旗方掠桑乾渡羽檄已入金臺陌勇士如鷹
健欲飛虜王似兔何勞擢戎服押俘獻廟社正衙第

賞頒詔冊端門賜酺天下慶御觴尚恨滄溟迳從來
文吏喜相輕聊遣濡毫書竹帛

古別離

孤城窮巷秋寂寂美人停梭夜歎息空園露溼荆棘
枝荒蹊月照狐狸迹憶君去時兒在腹走如黃犢爺
未識紫姑吉語元無據况憑瓦北占歸日嫁來不省
出門前魂夢何因識酒泉粉繇磨鏡不忍照女子盛
時無十年

寄子虞

吾兒適淮壖送之梅市橋三年安得過思汝雙鬢凋
今年當代歸秋色已蕭蕭迎汝不憚遠夢沂錢塘潮
人事不可料邑民挽歸橈郡牧部使者交章聞之朝
增秩復使留此事久寂寥念汝未育子大女方垂髫
小女聞學行想像扶牀嬌汝少知讀易外物莫能搖
但願早舉孫不必七葉貂歸來郎罷前相從樂簞瓢
泛舟自中堰入湖

水縮沙洲出霜清木葉丹鷺羣橫澹靄鴉陣報初寒
冷落人情見衰遲世念闌惟留一句子村舍話團圓

夜歸舟中作

意薄楊脩喚小兒孤舟自笑髮成絲放開癡腹無非
夢拈起幽懷總是詩霜下忽驚桐葉盡難生更覺水
聲奇餘年那恨驅黃犢除却爲農百不宜

蓬萊閣聞大風

天風搖蕩萬松聲卷海頽山得我驚觸灑瀨堆秋起
柁鏖臯闌下夜還營荷戈老氣縱橫在看劍新詩效
唾成興盡却尋湖上路醉看月墮斗杓傾

小出塞曲

全師出雁塞百戰運龍韜金絡洮州馬珠裝夏國刀
度沙風破肉攻壘雪平壕明日受降處甲齊熊耳高
冬日園中作

園荒闕掃除籬敗且枝梧久旱池萍死新霜野蔓枯
寒廬殊未議濁酒却時酤飛動郊原興飢鷹待指呼

登山亭

新得天台古澗藤強扶衰疾蹋峻嶒登高臨遠雖多
感歎老嗟卑却未曾紙上是非難盡信人間禍福有
相乘早知等是枯魚肆乞水何須望斗升

拄杖歌

道人四壁空無有一炷清香閑袖手床邊獨有拄杖
子疾病相扶真我友禪房按膝秋聽雨野店敲門莫
賒酒畏途九折歷欲盡世上誰如君耐久老矣更踏
千山雲何可一日無此君歸來燈前夜欲半露柱說
法君應聞

冬晴

吳中霜雪晚初冬正佳時丹楓未辭林黃菊猶殘枝
鳴雁過長空纖鱗泳清池氣和未重裘臨水照鬚眉
悠然據石坐亦復出門嬉野老荷鋤至一笑成幽期

冬夕

犬吠驚飄葉禽喧換宿枝墮空霜肅肅垂地斗離離

野叟讀書罷高城吹角悲功名渾錯料老病却如期

又

不寐起中夕披衣增慨慷千金空市骨三沐竟刳腸
世事龔能識吾生安用長布裘茆屋底死去亦芬芳

十月十五夜對月

離海月盈丈寒光萬里明衆星斂欲盡一鏡獨徐行
重露滴松鬣高風吹鶴聲老來殊畏冷不盡倚闌情
久疾

久疑無時已殘年莫更論流離魂未返窮苦舌空存
畊壠關心事祠官荷主恩但愁垂老眼不見定中原

又

殘年仍臥疾窗戶夜悒悒一日且復過久生非所欽
暗塵侵藥笥微月伴衣砧萬里懷良友前盟可得尋

又

幽屏元無事沉絲自鮮歡脛長猶可截冠挂豈容彈
擣藥香塵細尋書蜜炬殘晚來差覺健風月小庭寬

舍北望牛頭山山有延勝寺先太傅書堂在焉
六年前嘗泛小江往遊寺焚於睦寇書堂無復

存矣

太傅讀書處秋風曾問途江如青弋險山似白鹽孤

山形絕類夔府之白鹽但差卑小耳路盡還登嶺林開忽見
湖艸堂無復識流涕想規模

十月十九日大風作寒閉戶竟日

霜風捲地起落葉擁蝸廬終日澹無事一窗寬有餘
坐多知力耗食少覺心虛懶惰無新句松聲忽起予

寄天封明老

浪迹天台一夢中距今四十五秋風勝遊回首似昨
日衰病侵人成老翁聖寺參差石橋外仙蓬縹緲玉
霄東因君又動青鞵興目斷千峯翠倚空

村居

衰病汗朝著恩寬得免歸蠶能心自信不恨世相違
草市寒沽洒江城夜擣衣是中堪送老高枕謝招麾

又

自笑觸藩羝人嘲失日雞囊慳衣任短山冷屋便低
宦拙讒銷骨言狂悔噬臍自今焚筆研有手但扶犁
十月下旬暄甚戲作小詩

老怯霜風盡日眠素屏紙帳擁蠻氈爲君小試回春
手便似暄妍二月天

霜天雜興

楓葉全丹槲葉黃江城殘角伴斜陽琴書自足閑中
樂天地能容醉後狂老死山林初不憾夢遊河渭獨
難忘穀城黃石今安在取履猶思効子房

又

萬鼓風聲吼屋邊老人裘綺旋裝綿晨梳墮髮知衰
甚夜枕聞雞尚慨然身後文章空飽蠹眼前交舊半
沉泉飯蔬飲水平生慣恥向天公更乞憐

又

少學愚公一味愚莫年仍似病相如閑吟寄友惟生

紙草具留僧只野蔬雨澀溪流殊未足霜高木葉已
無餘潭州丞相憐衰疾細字時收尺素書

萬里浮雲一掃空碧天無際日曠曠歡聲四起春風
裏恰似祥符景德中

昔者戊梁益寢飯鞍馬間一日歲欲莫揚鞭臨散關
增冰塞渭水飛雪暗岐山悵望釣璜公英槩如可還
挺劍刺乳虎血濺貂裘殷至今傳軍中尚媿壯士顏
豈知墮老境槁木蒙霜菅澤國氣候晚仲冬雪猶慳
曩事空夢想擁褐自笑孱胡星未買地大弓何時彎
寄題王俊卿看山堂

廣文風度絕清真一代論交不數人車馬到門常謝
病北山雖遠却相親

又

閉戶終年懶出遊北山山色可消愁何時一掃胡塵

盡更約同吟太華秋

絕歎

老屋環青嶂衰翁臥白頭殘書且遮眼薄酒不澆愁
世故真難料吾生愈覺浮餘年更須惜幸得返山丘

風雨

風雨連三日衰翁不下堂弄書聊自適與世已相忘
坼栗經霜飽搓橙帶露香地爐供小飲亦足慰淒涼

晚過鄰曲

陽狂跌宕送年華信步來尋野老家淺瀨水清逢立
鷺橫林葉盡數栖鴉書生一飽依耕耒壯士孤愁入
戍笳王績但思酣美醞葛洪不復問丹砂

莫仲謙挽詞

懷器潛山澤逢時起薜蘿星辰占寶劍雷雨化龍梭
禹穴書雖富浯溪石未磨門閭更須築有子繼三科

病起

一病輒經旬幾病能不死誠知迫頽年暫健亦自喜

半窗風竹影晴景極清美讀書雖益懶尚可日百紙
引鏡整角巾病思真一洗悠然度朝晡萬事如覆水

晚興

一聲天邊斷雁哀數蕊籬外蚤梅開幽人耐冷倚門
久送月墮湖歸去來

贈粉鼻畜貓名也

連夕狸奴磔鼠頻怒髯喫血護殘困問渠何似朱門
裏日飽魚殮睡錦茵

與兒輩論李杜韓柳文章偶成

吏部儀曹體不同拾遺供奉各家風未言看到無同
處看得同時已有功

夢至小益

夢覺空山淚漬衿西遊歲月苦駸駸葭萌古路緣雲
壁枯柏浮梁暗欒林坐上新聲猶蜀伎道傍逆旅已
秦音荷戈意氣渾如昨自笑摧頽負壯心

懷紹興間往還諸公

早歲從諸傑森然盡國華辭工出月脇筆健拔鯨牙
道在窮何憾年徂生有涯湖山元不改老淚溼風沙

磨衲道衣

久脫朝衣學道裝溪雲埜鶴作身章何時九轉丹砂

熟却插金貂侍紫皇

溪上作

落日溪邊杖白頭破裘不補冷颼颼驚愚酷信紙上
語老病猶先天下憂未俗陵遲稀獨立斯文崩壞欲
橫流紹興人物嗟誰在空記當年接俊遊

又

偃僂溪頭白髮翁莫年心事一枝筇山銜落日青橫
野鴉起平沙黑蔽空天下可憂非一事書生無地効
孤忠東山七月猶關念未忍沉浮酒醖中

小憩

徐行散腰膂小憩嗇精神休養觀書眼調娛宴坐身
青氈我家舊紅粟太倉陳温飽無餘事寒龜息自勻

癸丑十一月下旬溫燠如春晦日忽大風作雪
今年一冬晴日多草木萌甲風氣和百錢布被未議
贖老翁曝背兒行歌吾儕小人慮不遠積雪苦寒來
豈晚青天方行三尺烏不料黑雲高巖嵒明朝雪惡
凍復餓兒啼頰皴翁噤臥九重巍巍那得知閤門催
班百官賀

占城櫻竹拄杖

參雲氣壓葛陂龍跨海來扶笠澤翁八十尚思行脚
在與君處處現神通

西城

市步羣囂散關門夕照明河流倒橋影雪野聚鳥聲
繁杵聞深巷寒煙下廢城匆匆舩盡發爭趁早潮平

東城

墟落斂莫煙林梢偃新月河橋燈漸鬧柳岸船猶發
薄酒吹欲無佇立搔短髮誰知七十翁歲晚念裘褐
斯道

斯道有顯晦所憂非賤貧乾坤均一氣夷狄亦吾人
朋黨消廷論鉏耰洗戰塵清時更何事處處是堯民

病起山居日有幽事戲作

靈府超然外物輕靜中談笑却三彭晴窗風竹參差
影霜樹山禽格磔聲客出異苗咨藥品僧攜奇篆乞
書評幽居亦未全無事更用人間有姓名

又

鶴骨龜腸欲不禁扶衰初喜罷呻吟益山冰釋書窗
暝藥竈香濃道院深筆健乍臨新獲帖手生重理舊
傳琴閉門局促還堪恨雲海何時豁此心

蝸廬

蝸廬四壁空也過百年中葑火朝供爨蘆綿夕禦風
不憎窮有祟自以放名翁但恨村醪薄衰顏只覿紅
冬夜讀書有感

一指頭禪用不窮一刀七藥去凌空汗牛充棟成何
事堪笑迂儒錯用功

又
胸中十萬宿貔貅，阜纛黃旗志未酬。
莫笑蓬窗白頭客，時來談笑取幽州。

十二月九日枕上作

臥聽百舌語簾櫳，已是新春不是冬。
堪歎老來如許病，正令無病亦無悰。

記夢

黃河袞袞抱潼關，蒼翠中條接華山。
城郭丘墟人盡老，藥爐依舊白雲間。

又

西巖老宿雪垂肩，白石爲糧四百年。
喜我未忘山下路，慙慙握手一欣然。

又

三髻山童喜欲顛，下山迎我拜溪邊。
松陰拂罷蒼苔石，接竹穿雲理舊泉。

鏡湖女

劍南詩稿目錄

卷第二十九

水村曲 石洞餉酒 霜寒 偶書 讀史

飲石洞酒戲作 霜寒 賽神曲 涼州行

望夫石 江村道中書觸目 采蓮曲 兀坐

頗念遊歷山水戲作 五雜組二首 漁屏

詠史 烏棲曲 古別離 書歎 十二月二

十六夜聽雨 起晚 陳少監餉澄清堂酒

雪中作 甲寅元日子七十矣酒間作短歌示

子 七十 正旦後一日 立春 老境 偶

懷小益南鄭之間悵然有賦 再用前韻不依

次 北坡梅開已久一株獨不著花立春日忽

放一枝戲作 人日 夜讀呂化光文章拋盡

愛功名之句戲作 遇術士飲以卮酒 閒趣

正月二十日晨起弄筆 春夜讀書 春晴

泛湖入城 書齋壁二首 春日睡起 老病

謝客或者非之戲作 永日無一事作詩自詒

窗前作小土山 莖蘭及玉簪 最後得香百合

併種之戲作 泛舟觀桃花五首 新闢小園

五首 上巳小飲 追憶乾道中嘗以是日病酒

留三泉江月亭 悽然有感 晚步門外散懷二

首 欲出遇雨 飢坐戲詠 蔬食 山亭

久不得張漢州書 春晚村居 遊雲門諸蘭

若 與子坦子聿遊明覺十四韻 淨智西窗

小僧乞詩 西窗睡起 平水 三月二十

五夜達日不能寐二首 園中小飲 舟中夕

望 四月一日作 舟行過梅市 山園雜賦

四首 西窗 山頭鹿 夏四月渴雨恐害布

種代鄉鄰作插秧歌 雲童童行 董逃行

閔雨二首 喜雨 初夏 村舍 烏啼 感

舊 讀書至夜半燈盡欲睡慨然有感 遣興

農舍 四月晦日小雨 泛舟過吉澤 書

歎 五月得雨稻苗盡立 薄醉遣懷

宋陸游

...

...

...

...

...

...

...

...

...

劍南詩稿卷第二十九

宋陸游務觀

水村曲

山村今年晚禾旱
奏下民租蠲大半
水村雨足米狼戾也
放三分慰民意
看榜歸來送歌舞
共喜清平好官府
老翁猶記軍興時
汝輩少年那得知

石洞餉酒

忘憂自古無上策
欲飲家貧酒盃迨
今朝鵲喜報遠餉
未圻赤泥先動色
魚長三尺催膾玉
巨蟹兩螯仍斫雪
勿言地僻少過從
清風明月俱吾客
驅除二豎走三彭
零落眼花生耳熱
陶然酣臥聽松聲
媿爾公卿足憂責

病退

病退身仍健
春回日漸長
神訶金鼎藥
龍出玉函方

美睡三竿日安禪半篆香殘年已如許幸復起膏肓

偶書

身放江湖遠年推里巷尊隣翁分酒子羽客借桐孫
泱泱冰消澗纖纖柳映門小車非漢相時亦到前村

讀史

南言蓴菜似羊酪北說荔枝如石榴自古論人多類

此簡編千載判悠悠

飲石洞酒戲作

酣酣霞暈力通神澹澹鵝雛色可人一笑破除垂老
日滿懷搖蕩隔年春梅花的吹初破楊柳纖纖染

未勻醉倒橋邊人不怪西曹免護相君茵

霜寒

霜重晨簷滴薪乾夜焙温老惟便布褐病不出柴門
瓶裏梅花墮窗間鶻語喧閑人信無事午睡到黄昏

賽神曲

擊鼓坎坎吹笙嗚嗚綠袍槐簡立老巫紅衫繡裙舞

小姑烏白燭明蠟不如鯉魚糝美出神廚老巫前致
詞小姑抱酒壺願神來享常驩娛使我嘉穀收連車
牛羊莫歸塞門閭雞鶩一母生百雛歲歲賜粟年年
蠲租蒲鞭不施園土空虛束草作官但形模刻木爲
吏無文書瀄風復還羲皇初繩亦不結況其餘神歸
人散醉相扶夜深歌舞官道隅

涼州行

涼州四面皆沙磧風吹沙平馬無迹東門供張接中
使萬里朱宣布襖勅勅中墨色如未乾君王心念兒
郎寒當街謝恩拜舞罷萬歲聲上黃雲端安西北庭
皆郡縣四夷朝貢無征戰舊時胡虜陷關中五丈原
頭作邊面

望夫石

送君遠成交河北男兒自以身許國不能彎弓騎惡
馬欲隨君去何由得登山矯首西北雲形容雖變心
猶存月明夜夜照淚痕鐵心石腸輸與君

江村道中書觸目

短籬曲曲對開門
脩竹陰陰不見村
別浦回潮魚滬
密孤舟春近雁沙
溫路逢行客時交
轡店賣新醅一
舉樽忽過亂山幽
絕處恍如白帝到
東屯

采蓮曲

采蓮吳姝巧笑倩
小舟點破煙波面
雙頭折得欲有
贈重重葉蓋羞人
見女伴相邀拾翠
羽歸棹如飛那
可許傾鬟障袖不
謗人遙指石帆山
下雨

兀坐頗念遊歷山水戲作

萬里當時寄一官
十年客枕不曾安
鬼愁灘下扁舟
晚蛇退陂前古驛
寒昔歎遠遊生雪
鬢近緣多病學
金丹功名非復衰
翁事獨有江山興
未闌 鬼愁灘在安
康漢江中蛇退陂
在夔施兩郡之間
皆畏途也然山水
特奇

五雜組

五雜組山雉羽往復還
江頭路不得已貴臣去

又

五雜組機上綺往復還冶遊子不得已富兒死

漁扉

湖上千峯翠作圍正應佳處著漁扉迂疎自計難謀
食老病誰令未拂衣萬里滄波鷗乍沒千年華表鶴
重歸一盂粟飯吾何恨自古高人有采薇

詠史

夜雨燈前感慨深爲邦一士重千金風雲未展康時
略天地能知許國心劍忽拄頤都將相帽曾壓耳隱
山林英雄自古常如此君看隆中梁甫吟

烏棲曲

楚王手自格猛獸七澤三江爲苑囿城門夜開待獵
歸萬炬照空如白晝樂聲前後震百里樹樹棲烏盡
驚起宮中美人謂將日髮澤口脂費千萬樂聲早莫
少斷時莫怪棲烏無穩枝

古別離

君北遊司并我南適熊湘邂逅淮陰市共飲官道傍

丈夫各有懷窮達詎可量臨別一取醉浩歌神激揚
勲業有際會風雲正蒼茫亂點劍峯血苦寒芒屢霜
死卽萬鬼鄰生當致虞唐丹雞不須盟我非兒女腸

書歎

夜深青燈耿窗扉老翁稚子窮相依齏鹽不給脫粟
飯布褐僅有懸鶉衣偶然得肉思共飽吾兒苦讓不
忍違兒飢讀書到雞唱意雖甚壯氣力微可憐落筆
漸健快其奈瘦面無光輝布衣儒生例骨立紈袴市
兒皆瓠肥勿言學古徒自困吾曹捨此將安歸作詩
自寬亦慰汝吟罷撫几頻歔歔

十二月二十六夜聽雨

新春尚七日小雨暗江城茆簷夜點滴已作春雨聲
輕黃上柳枝嫩綠抽菊萌造物本何心誰主此發生
頗疑重雲外斗杓已東傾老至不可却一尊忘濁清

起晚

傍簷百舌語瓊瓏已覺新春在眼中欲起未成還小

睡忽看初日滿窗紅
陳少監餉澄清堂酒

酣暢年來豈易逢
齋湯蜜汁亦時中
玉醅忽逐春風至
一吸懸知百榼空

雪中作

黑風卷地連三日
密雪穿簾又一回
衰病不禁天色惡
笑談誰共酒尊開
忍寒瘦馬嘶空櫪
覓食飢鴉啄廢臺
笑遣蠻童撼園竹
輟羹分火待歸來

甲寅元日子七十矣酒間作短歌示子

我昔自蜀歸百年已過半
觀棋未終局回視斧柯爛
飽知山林樂富貴何足換
退休失健決正坐闇且懦
齒髮日衰殘歲月難把玩
蕭朱尚或隙籍湜固宜畔
出門無一欣撫事有三歎
新年遂七十推敬媿里閭
眷眷惜茲夕凜凜畏明日
豁然忽大笑愁若春冰泮
窮達真兩忘生死付一貫
清尊既漱灑碩果亦璀璨
擁門紛鼓笛上壽列童冠
老翁亦忘疲起舞影零亂

不獨誇癡頑自足洗患難投床判宿醒美睡到日軒

七十

七十殘年百念枯桑榆元不補東隅但存隱具金鴉
鬚那夢朝衣玉鹿盧身世蠶眠將作繭形容牛老已
垂胡客來莫問先生處不釣娥江卽鏡湖

正旦後一日

七十今年是連朝樂未休比鄰更頌禱親黨共遲留
羊映紅纏酒花簪絳帕頭從今日有喜農事起西疇

絳帕頭蓋以絳帛飾巾幘之類

立春

採花枝上寶旛新看遍秦山楚水春村舍不知時節
換傍檐百舌苦撩人

老境

髮白未及童齒搖未及脫正如一席飲燒燭將見跋

谿山環草舍霜露侵布褐文章雖自力亦已強弩末
寧將垂老耳更受世事聒匡廬入我夢行已寄瓶鉢

偶懷小益南鄭之間悵然有賦

西戍梁州鬢未絲
蟠山漾水幾題詩
劍分蒼石高皇迹
蟠冢廟傍有高皇
試劍石中分如截
巖擁朱門老子祠
三泉道上有老君洞
景趣幽邃燒兔驛
亭微雪夜騎驢棧路
早梅時登臨不用頻
悽斷未死安知無後期
再用前韻不依次

憶昨從戎丞相府
元瑜書檄仲宣詩
雲屯騎士臨邊日
魚貫降胡獻捷時
史冊誤人悲壯志
關河回首負初期
豈知二紀身猶在
衰鬢星星老侍祠

北坡梅開已久
一株獨不著花
立春日忽放一枝戲作

日日來尋坡上梅
枯槎忽見一枝開
廣寒宮裏長生藥
醫得冰魂雪魄回

人日

新歲逢人日
老夫持道齋
斷冰浮野水
微綠發枯荄
霽景豐年象
今年元日至
人日皆晴閑
吟曠士懷春
旛已

陳迹鬪巧笑吳娃前一日立春

夜讀呂化光文章拋盡愛功名之句戲作

玉闕西望氣橫秋肯信功名不自由却是文章差得力至今知有呂衡州

遇術士飲以卮酒

行藥來村北觀魚立水邊忽逢長揖客能算小行年
酒薄聊頰頰囊空闕贈錢時清君未死訪我華山前

閑趣

老子卽今雙白鬢鏡湖自古幾青山半窗蘿月獨欹
枕滿院松風常掩關天地許寬誰礙汝琴尊是處可
開顏將行亦莫買春草幸有一筇相伴閑

正月二十日晨起弄筆

深院窗扉曉色遲新愁宿醉兩參差雨聲欲與夢相
入春意不隨人共衰零落殘梅臨小約縱橫野水赴
清池物華撩我緣何事似恐新年漸廢詩

春夜讀書

枉是儒冠遇太平窮人那許共功名
枯腸不飽三升稷皓首猶親二尺檠
寓世已爲當去客愛書更付未來生
夜闌撫几愁無奈起視離離斗柄傾
春晴泛湖入城
春色初回杜若洲隔煙時見矯輕鷗
嵩雲緜月年年夢楚柁吳檣處處愁
魚躍銀刀論網買酒傾綠蟻滿盃浮
前生杜牧吾身是又向江南遍倚樓

書齋壁

老病人扶氣力微闌干西角立斜暉
流年冉冉功名誤新冢纍纍故舊稀
仗馬曾鳴宜永棄牧羝雖乳敢言歸
住菴活計無多子只要筇杖與衲衣

又

落魄人間不記年晚營茆棟鏡湖邊
室空惟是四壁立面瘦漸生雙頰顴
地僻門無殘客到歲豐路有醉人眠
君看朝市紅塵鬧始信吾曹是地仙

春日睡起

睡起悠然弄衲琴銅猊半燼海南沉淒涼故里逢春
處忠憤孤臣許國心水滿鳧鷖初拍拍雨餘花木已
陰陰吾兒捩施淮邊未歸近清愁轉不禁 子虞書報二
月離古壽

老病謝客或者非之戲作

病侵腰膂兩經秋欲下繩床不自由客至難令三握
髮佛來僅可小低頭安禪還我閑蒙衲怒氣從渠勇
挾轉亦欲署門還懶去死生貴賤本悠悠

永日無一事作詩自詒

目昏罷觀書足蹇停遊山二事差可樂造物乃復慳
得非閔我老作意鐫其頑掃除盡宿習使得終日閑
閑亦何負汝剡曲茆三間奇石玩犖角清流聽淙潺
勿言村醪薄數酌可解顏脩然日已夕臥看飛鳥還
窗前作小土山莖蘭及玉簪最後得香百合併

種之戲作

方蘭移取徧中林餘地何妨種玉簪更乞兩叢香百

合老翁七十尚童心

泛舟觀桃花

花溼二月桃花發霞照波心錦裏山說與東風直須
惜莫吹一片落人間 花溼桃花最盛處

又

桃源只在鏡湖中影落清波十里紅自別西川海棠
後初將爛醉答春風 自梅仙塢至花溼恰十里

又

種桃亦解比封君世故紛紛寂不聞九轉金丹應已
熟全家仙去隱紅雲

又

湖南小山花更多不醉將如春色何釣得鮮鱗堪斫
膾任教微雨溼漁蓑 湖南山名在柯山之南

又

鄰曲一生花裏活村翁疑是古遺民初來自被春留
住枉道當時為避秦

新闢小園

人生如意每難全
草草園池却自然
世事已拋高枕
外春風常在短筇前
墮空花片紛紅雨
徧地苔痕長
綠錢酒戶漸增詩興
在天容此老剩狂顛

又

西戍歸來鬢已霜
生兒又過乃翁長
眼明身健殘年
足飯軟茶甘萬事忘
學廢僅能書姓字
客來懶復倒
衣裳山園寂寂春將晚
酷愛幽花似蜜香

又

席地幕天君勿嘲
隨宜野藪與山榭
幽花避日藏深
葉歸燕尋人理舊巢
曲水詠觴空念昔
斜川鄰曲自
論交清貧尚媿茶山在
送老湖邊有把茆
曾文清至歿
常寓僧舍

新展山園半畝強
笑人車馬出籠坊
山禽乍暝慙慙

語野蘄無風自在香
點點水紋迎細雨
疎疎籬影界
斜陽出門遙向鄰翁說
釋耒相從共一觴

又

東軒嫩日上疏櫺吹盡浮雲作意晴林暝牆頭雙鶻
語水清池面小魚行畦添藥品誰能別架引藤陰忽
已成倚杖怡然便終日老夫那復不平鳴

又

祠祿縻人未棄官春深幽國有餘歡筍生遮道妨行
藥果熟團枝礙整冠煮酒折泥初灑灑生綃裁扇又
團團退飛風際由來事莫羨青霄刷羽翰

上巳小飲追憶乾道中嘗以是日病酒留三泉
江月亭悽然有感

零落殘花一兩枝綠陰庭院燕差池隔牆笑語鞦韆
散惆悵三泉驛裏時元微之詩三泉驛內逢上巳

晚步門外散懷

大千沙界一浮漚成壞元知不自由寓迹箇中誰耐
久問君底事不歸休春陂欲雨黃鴉鬧晚渡無人白
犢浮七十之年何啻足戲憑藥物小遲留

又

萬化紛紛本一機，不爲腐骨欲安歸。
彭殤共盡孰脩短，堯桀兩忘無是非。
濡首極知當痛飲，翦翎那復許羣飛。
江郊未解春寒惡，高柳吹花又滿衣。

欲出遇雨

東風吹雨惱遊人，滿路新泥換細塵。
花睡柳眠春自嬾，誰知我更嬾於春。

飢坐戲詠

衰鬢蕭然滿鏡霜，一菴歸老鏡湖傍。
有懷每恨交朋遠，無食方知日月長。
落筆未妨詩袞袞，閉門猶喜氣揚揚。
晚來袖手蒲團穩，笑喚兒童代夜香。

蔬食

今年徹底貧，不復具一肉。
日高對空案，腸鳴轉車軸。
春薺忽已花，老筍欲成竹。
平生飯蔬食，至此亦不足。
孰知讀書却少進，忍飢對客談堯舜。
但令此道蠶有傳，深山餓死吾何恨。

大雲山亭

風惡闌回雨天寒勒住花尋幽扶柳栗息倦倚槎牙
分韻僧吟苦爭棋客笑譁相逢仍草草歸路並山斜
久不得張漢州書

儘道三巴遠那無一紙書衰遲自難記不是故人疎
春晚村居

一事元無可得忙悠然半醉倚胡牀牡丹枝上青春
老燕子聲中白日長身世已如風六鷁文章仍似閨
黃楊太平有象無人識南陌東阡擣麩香

遊雲門諸蘭若

花過木陰合溪雲生莫涼牛行響白水鷺下點青秧
古寺宛如昔穉松森已行道傍松及三十年則僧輒伐去復
種小者予自幼歲至今已見三種矣 耆年不下榻童子爲燒
香

與子坦子聿遊明覺十四韻

我自何山來覓路占樓鐘聯翩兩葛巾跌宕一短筇

深谷已曛黑夕陽猶半峯堂中千歲師磊砢如古松
殘僧三四輩斗粟各自舂長廊久寂寞香火亦闕供
頗聞在世時一鉢制惡龍時時出雷雨百里常年豐
宿緣忽云盡獻供無春農饒烏晨攫飯飢鼠夜穿墉
而況我輩人生世本不逢胡不安汝分終年抗塵容
靜觀興廢事可洗芥蒂胸一笑下山去村塢煙重重

淨智西窗

一窗新綠愜幽情袖手哦詩取次成牆外蜜蜂來又
去可憐終日太忙生

小僧乞詩

風前掩萼草吹香溪上霏微雨送涼萬里安西無夢
到却尋僧話破年光

西窗睡起

老便寂寂厭紛紛借得禪房臥看雲夜宴怕逢觥錄
事秋山傭伴獵將軍餘年敢望十寒暑夙習正須三
沐熏斜日滿窗誰喚起數聲啼鳥隔溪聞

平水

旅飯風埃小市傍却呼拄杖踏斜陽可憐陌上離離
草一種逢春各短長

三月二十五夜達日不能寐

愁眼已無寐更堪衰病嬰蕭蕭窗竹影磔磔水禽聲
捶楚民方急煙塵虜未平一身那敢計雪涕爲時傾

又

憂國心常折觀書眼欲枯百年終坎壈一飯且枝梧
忽忽殘春過迢迢清夜徂壯心空萬里老病要人扶

園中小飲

此老胸中萬頃寬小園幽徑日追歡寧教酒欠尋常
債恥就人求本分官高柳陰濃煙欲暝叢花紅溼露
初溥時月桂方盛開要知澤國年光晚已過清明尚淺
寒

舟中夕望

船掠湖堤不入城葛巾羽扇試春行女牆迤邐橫輕

靄佛閣崢嶸倚晚晴樹冒藤花堆故繡風吹鶯語送
新聲細思造物何由報遣作閑人過此生

四月一日作

桃李逢春次第開坐看零落付蒼苔壓車麥穗黃雲
重食葉蠶聲白雨來鏡裏頓驚年事速天邊誰挽斗
杓回可憐團扇塵侵損又見生綃月樣裁

舟行過梅市

新換單衣細葛輕脩然隨處得閑行綠陰浦口維舟
處霽日場中打麥聲醉叟臥途知酒賤耕農滿野喜
時平老來無復雕龍思遇興新詩取次成

山園雜賦

初夏未覺暑微陰殊勝晴藤冠稱新沐蓴菜解餘醒
偶據盤陀坐還扶柳栗行平生志勛業今日一毫輕

又

藤陰初覆架菱蔓漸穿萍水繞籬根綠山從樹罅青
長辭帝所夢不媿草堂靈賴有黃醅法終年任醉醒

又

一日老一日一年貧一年元無肉食相且作地行仙
本不營三窟何須直一錢村虛櫻筍開剩放醉中顛
芳荃真妙士霜菊亦奇才邂逅心生敬慙懃手自培
扶持新長桂護惜欲殘梅此意何人解頽然付酒盃

西窗

西窗偏受夕陽明好事能來慰此情看畫客無寒具
手論書僧有折釵評薑宜山茗留閑啜豉下湖蓴喜
共烹酒炙朱門非我事諸君小住聽松聲

山頭鹿

呦呦山頭鹿毛角自媚好渴飲澗底泉飢齧林間草
漢家方和親將軍灞陵老天寒弓力勁木落霜氣早
短衣日馳射逐鹿應弦倒金槃犀筋命有繫翠壁蒼
崖迹如掃何時詔下北擊胡却起將軍遠征討泉甘
草茂上林中使我母子常相保

夏四月渴雨恐害布種代鄉鄰作插秧歌

浸種二月初插秧四月中小舟載秧把往來疾於鴻
吳鹽雪花白村酒粥面濃長歌相贈答宛轉含幽風
日莫飛漿歸小市鼓擊擊起居問尊老勤儉教兒童
何人采此謠為我告相公不必賜民租但願常年豐

雲童童行

雲童童挾雨來雨未濡土雲已開不能為人斂浮埃
山南山北空聞雷青秧欲槁吁可哀

董逃行 讀古樂府擬作

漢末盜賊如牛毛千戈萬槊更相鏖兩都宮殿摩雲
高坐見霜露生蓬蒿渠魁赫赫起臨洮僵屍自照臍
中膏危難繼作如崩濤王朝荒穢誰復薶踰城散走
墜空壕扶老將幼山中號昔者羣枉根株牢衆憤不
能損秋毫誰知此亂亦不遭名雖放斥實遁逃平民
陪死聲嗷嗷今茲受禍乃我曹

閔雨

黃沙白霧晝常昏
嗣歲豐凶詎易論
寂寂不聞秧鼓動
啞啞實厭水車翻
粟困久盡無遺粒
淚席嘗沾有舊痕
聞道憂民又傳詔
蒼生何以報君恩
有詔禱雨天竺山

喜雨

楚巫奔走畏天慳
變化寧知轉盼間
初夜電光搖北斗
父老以北斗下有電候雨
平明雲氣冒南山
坐令沃野新秧遍
已覺豐年舊觀還
白首老農愁破處
夢回高枕聽潺潺

初夏

已作梅黃雨
猶餘麥秀寒
穿林紅練帶
拔地碧琅玕
酒向愁邊薄
衣從病後寬
所欣消渴減
乳酪正甘酸

村舍

門巷桑麻暗庖廚筍豉香僮奴課鉏菜婢子學燒糠
貧任青春過閑知白日長非關愛疎懶無事可成忙

鳥啼

野人無曆日鳥啼知四時二月聞子規春畊不可遲
三月聞黃鸝幼婦閔蠶飢四月鳴布穀家家蠶上簇
五月鳴鴉舅苗稚憂草茂人言農家苦望晴復望雨
樂處誰得知生不識官府葛衫麥餅有卽休湖橋小
市酒如油夜夜扶歸常爛醉不怕行逢灞陵尉

感舊

廢隴荒陂浥浥畊生無勛業死無名衰頹日甚君休
問三十年前白髮生紹興壬午予年三十八與查元章王嘉叟
同出垂拱殿門二君指予問曰子亦有白髮耶相與太息今三十二年
矣

讀書至夜半燈盡欲睡慨然有感

白髮蕭蕭老空谷人歎厄窮心自足東郊曉射墮錦

雉北崦春畊叱黃犢區區世事何足論未死斷知常
閉門關河好在萬里路理亂不至三家村夜分燈暗
月入戶賦詩肯道儒冠誤飢鷹勁翮高有聲橫截陂
湖正南去

遣興

壯歲元多病長年敢自期賤貧交易絕憂患夢常悲
續食叨微祿寬心賴小兒平生鏡湖上天乞小茆茨

農舍

農舍雖云苦君恩詎可忘繭稠初滿簇麥熟已登場
渺渺開村路登登築野塘但須時雨足擊壤詠時康

四月晦日小雨

霏霏亂點暗朝光蔌蔌奇聲渡野塘一浦未輪新漲
綠四郊聊壓旱塵黃風生團扇清無暑衣覆熏籠潤
有香竹屋茆簷得奇趣不須殿閣詠微涼

泛舟過吉澤

蕭蕭菰蒲如荻林五月已覺秋意深煙波滅沒有漁

艇浦激飛鳴多水禽稽山出雲極奇變陸子岸幘方
微吟一聲菱唱起何許洗盡萬里功名心

書歎

高廟衣冠月出遊中原父老淚交流諸公誰効回天
力散吏空懷恤緯憂雨細漁菴晨舉網月明畊隴夜
驅牛神州克復知何日北望飛蓬萬里秋

五月得雨稻苗盡立

城郭迎龍鼓吹喧甘膏三夕慰黎元草荒常日經行
路水到前村舊漲痕黃犢盡畊稀曠土綠苗無際接
旁村家家足食山無盜安枕何勞夜閉門

薄醉遣懷

跼蹐蝸廬迮蕭條鶴髮新途窮貧入夢身老病欺人
帶索忘三組羹藜抵八珍蓬窗一盃酒自覺膽輪困

劍南詩稿卷第二十九終

劍南詩稿目錄

卷第三十

五月十一日夜坐達旦 題陽關圖 新暑書

事 時雨 示客 南堂默坐 夏日 小酌

夏夜二首 看鏡二首 明妃曲 思遠遊

太息 六月二十六日夜夢赴季長招飲

夜分不寐起坐園中至旦 露坐 晨起 散

步東邨 早秋四首 七月二十一日午睡夢

泛江風濤甚壯覺而有賦 幽居戲贈鄰曲

遣興二首 步至湖上寓小舟還舍五首 送

王仲言侔泰州絕句二首 醉中作 秋夜書

感 八月三日驟涼有感 南堂與兒輩夜坐

泛舟至魯墟 園蔬薦村酒戲作 雨夕排

悶二首 雨中作 讀易 郊行夜歸有感

醉歌 買酒 秋雨歎 憂國 夜意 大風

雨中作 題齋壁二首 窮途 貧病 秋晚

四首 山村書所見二首 三年前嘗與兒輩

步過東涇小嶺得勝處可營別墅貧不能成偶

復至其地悵然有感 園中秋夕 秋晴每至

園中輒抵莫戲示兒子 醉睡初覺偶作 汪

茂南提舉挽詞二首 謝徐居厚汪叔潛攜酒

見訪 喜鄭唐老相過 秋晚散步門外 寄

徐秀才斯遠并呈莊賢良器之 閒中 秋霽

晨起 篋篋謠二首寄季長少卿 悶極有

作 自詠 夢范參政 乞奉祠未報食且不

繼 山寺 太師魏國史公挽歌詞五首 三

峽歌九首 十月三日泛舟湖中作 早行

晚泊 遣懷 舟行戲書

五尺十一日舟中對日 臨別圖 錄書書

劍南詩稿卷第三十

宋陸游務觀

五月十一日夜坐達旦

莫笑耽書不計年，寒儒業定幾生前。
讀經今日韋編絕，作賦當時鐵硯穿。
公路晚悲身至此，令威歸歎塚纍然。
三更聽雨蓬窗底，又作鰥魚夜不眠。

題陽關圖

誰畫陽關贈別詩，斷腸如在渭橋時。
荒城孤驛夢千里，遠水斜陽天四垂。
青史功名常蹭蹬，白頭襟抱足乖離。
山河未復胡塵暗，一寸孤愁只自知。

新暑書事

城中五月汗霑衣，吾愛吾廬喜氣微。
珍簟含風來遠餉，輕羅疊雪出鳴機。
艾人當戶佳時過，筒黍堆盤舊俗非。
漫欲題詩還嬾去，老來百事與心違。
去歲業正則

餉斲簞得以禦暑今年蠶事僅得五六分遂辦暑服

時雨

時雨及芒種四野皆插秧家家麥飯美處處菱歌長
老我成情農永日付竹床衰髮短不懶愛此一雨涼
庭木集奇聲架藤發幽香鷺衣溼不去勸我持一觴
卽今幸無事際海皆農桑野老固不窮擊壤歌虞唐

示客

桑柘成陰百草香縹車聲裏午風涼客來莫說人間
事且共山林夏日長

南堂默坐

日日樹頭鶻鳩鳴夜夜谿邊姑惡聲堂中老子獨無
語寂然似可終吾生大鵬一舉九萬程下視海內徒
營營秋蟲春鳥非我類何至伴渠鳴不平

夏日

燕子生雛梅子黃斷雲殘雨過林塘孤舟正作苓簪
夢九陌難隨褊織忙團扇興來閑弄筆寒泉漱罷罷獨

焚香太平處處熏風好不獨宮中愛日長

小酌

白髮蕭然海上村猶能草草置清樽今年項里楊梅熟綠李來禽不足言

夏夜

露溼芙蓉冷月明蒼蘆香殘醉吹欲無聽聽髮根涼
豈惟棄世事形影亦相忘空憶南山下新秋射虎場

又

我昔在南鄭夜過東駱谷平川月如霜萬馬皆露宿
思從六月師關輔談笑復那知二十年秋風枯苜蓿

看鏡

凋盡朱顏白盡頭神仙富貴兩悠悠胡塵遮斷陽關
路空聽琵琶奏石州

又

七十衰翁臥故山鏡中無復舊朱顏一聯輕甲流塵
積不爲君王戍玉關馬正惠公喜功名每日幸未甚衰若有邊

警願預征行得良馬數疋輕甲一聯足矣

明妃曲

漢家和親成故事萬里風塵妾何辜掖庭終有一人行
敢道君王棄蕉萃雙駝駕車夷樂悲公卿誰悟和戎非
蒲桃宮中顏色慘難鹿塞外行人稀沙磧茫茫天四圍
一片雲生雪卽飛太古以來無寸草借問春從何處歸

思遠遊

我志日已衰詩亦無傑句正如隨翅鶴悵望遼海路
雖云須藥物幸未迫霜露裂裳裹兩踵此詩亦已屢
嗟峨青城雲慘淡蟠冢樹秋風吹短裘萬里入芒屨

太息

太息重太息吾生誰與歸那知莫景迫但覺故人稀
避禍歸猶因憂讒默亦非今年貧徹底擬賣舊漁磯

六月二十六日夜夢赴季長招飲

少城駿馬逐春風二十年間萬事空清夢都忘雙鬢

改繡筵還喜一尊同烏巾掩冉簪花重羯鼓敲鏗列
炬紅安得此歡真入眼碧油幢擁主人翁

夜分不寐起坐園中至日一

涼氣蘇衰疾幽情入杖藜月驚孤鵲起天帶衆星西
松菊今彭澤山川古會稽清吟殊未愜嗷嗷已晨雞

露坐

此手乃可憐經月不把酒著書又苦晚何以圖不朽
空庭坐三更磊落垂北斗向來歷關河萬里空回首
豈知三十年竟作越中叟後生雖滿眼非復舊交友
形體迫衰謝妻子亦何有悵望懷古人吞聲死農畝

晨起

心安已到無心處病去渾如未病前晨起更知秋色

好一庭風露聽鳴蟬

散步東邨

偶從北崦繚東崗曳杖行歌踏夕陽一徑入雲多鹿
跡數家臨水共漁梁埜風蕭瑟知秋早社酒淋漓喜

歲穰鄰曲不須憐老憊尚能尋句荅年光

早秋

涼颼浙浙撼庭柯微雨蕭蕭集浦荷
艸閣檐虛覺山近蓬窗地迳得香多
謀身自拙窮無鬼閉戶長閑睡
有魔臺省諸公盛冠劍固應老子得婆娑

又

秋入房櫳夜漸長紗廚笛簟法新涼
蜜光得意穿簾隙桐葉知時拂井牀
世事本來誰得鹿人生何處不
亡羊燈前笑向吾兒說又過銅匱半篆香

又

落魄巴江號放翁斯名歲晚亦成空
酒醒遙夜孤舟雨睡美清秋一榻風
駭浪千重無死地神丹九轉有新功
雲端不遇飛仙過誰顧幽人寂莫中

又

貂裘塵土憶東周瓜隴風霜隱故侯
懶似老雞頻失日衰如蠹葉早知秋
壺觴非復平生友歲月空添客

子愁病起筆端猶健在未妨揮灑賦登樓

七月二十一日午睡夢泛江風濤甚壯覺而有

賦

夢中不記適何邦風飽蒲颿入大江久矣眼中無此
快蹴天雪浪濺船窗

幽居戲贈鄰曲

莫年遠屏天所借落佩倒冠如得謝雖無壺酒助歌
呼幸有蠹書供枕藉市聲不聞耳差靜車轍掃空身
轉暇雨慳葵葉未吐甲露重榴房初坼罅深紅菱角
密覆水爛紫蒲桃重垂架直令掩關避世俗未害煎
茶喚鄰舍蕭蕭雞犬衡門晚寂寂燈火幽窗夜勸君
切勿縱高談性命如絲不禁嚇

遣興

失馬真成福移山未必愚故園三徑廢餘俸一錢無
望道心常渴觀書眼欲枯宦遊歸自好不必爲尊鱸

又

療飢惟恃粥動步已須人欲午猶支枕經旬不過鄰
鵲棲寒自穩鷗沒遠難馴莫笑謀身拙黃冠學季真
步至湖上寓小舟還舍

淒涼懷古地慘澹莫秋天紅樹秦馳道青山禹廟壩
湖風飄斷角墟日起孤煙老恨功名晚無人共著鞭
又

山居苦無事攜稚出門行酒賤逢人醉農閑到處耕
巷牛聽晚笛池鷺唼枯萍東望生秋興樓臺壓繚城
又

病墮支離境閑尋漫浪遊湖平天鏡曉山峭石帆秋
賒酒家家許看花處處留歸途倦扶杖却上釣魚舟
又

萬壑爭流地身閑得縱觀未能容蟹舍聊得寄漁竿
遠浦樵風急空山窅石寒踟躕不知晚磔磔有歸翰
又

細浪隨搖楫新涼入岸巾斷行初到雁空擔莫歸人

漫道貧非病誰知懶是真疎鐘起詩思迢遞度煙津
送王仲言倅泰州絕句

汝陰太史萬籟藏酸棗先生六世芳豹尾屬車留不
住却尋陳迹海陵倉晁景迂與先太史有海陵酬唱

又

紫薇傑作傳千載物色分留待下車老病難陪曳裾
客因來時寄一行書劉貢甫嘗爲泰倅

醉中作

舴艋爲家雲作友流年盡付樽中酒清歡穿林鸞鳳
吟草書落紙龍蛇走人間無復王景略千載風雲常
寂寞安得熊羆十萬師蹴踏幽并洗河洛

秋夜書感

闌干斗插西慘淡河絡角開歲財屬爾草木忽搖落
平生歷畏塗赤手犯蛟鱔幸收垂盡日歸臥一丘壑
鄉鄰怪此老駘麟尚如昨使無湖海寬朝市何處著
諸公方袞袞一士要諤諤謀食古所羞終身美藜藿

八月三日驟涼有感

殘暑侵人畏汗霑清秋乍見月纖纖自燒熟火添香
獸旋把寒泉注硯蟾佳客誤占螢入戶遠書空喜鶻
鳴簷悠然獨對清燈臥誰念柴門老病兼俗以螢飛入
室爲有客至之兆

南堂與兒輩夜坐

殘暑初歸肺病蘇胡床清夜集前除風高木葉危將
脫月上天河淡欲無鶻影繞枝棲未穩荷盤擎露重
相扶淒然又起流年感兩鬢如蓬日夜枯

泛舟至魯墟

南蕩東陂弄夕霏葛巾鶴氅試秋衣纖纖新月迎船
出兩兩珍禽背水飛病思漸蘇開酒戒宦情已絕謝
塵鞿郊居是處堪乘興不怕城笳苦喚歸

園蔬薦村酒戲作

身入今年老囊從早歲空元無擊鮮事常作啜醢翁
菹有秋菰白羹惟野苧紅何人萬錢筍一笑對西風

雨夕排悶

買牛耕剡曲舉世笑迂疎
流落愈憂國衰殘猶讀書
滔滔安稅駕耿耿獨愁余
破屋秋多雨情懷用底摠

又

煙雨暗郊墟頽然臥草廬
蟲喧夢回枕燈伴讀殘書
短褐頻關念荒畦久廢鋤
更堪湖水漲累日食無魚
湖水泛則魚不可捕

雨中作

社瓮醅香燕子歸陰風吹雨暗
郊扉疏溝園叟方攜
鍤采藥蠻童已溼衣
山雉尾垂衝靄去水雞翅重躡
波飛憑闌一笑君知否
肺渴秋來勢漸微

讀易

揖遜干戈兩不知
巢居穴處各熙熙
無端鑿破乾坤
祕禍始羲皇一畫時

郊行夜歸有感

小市歌呼散幽人悄
獨行斷鴻沙際冷
重露草根明

信古癡常絕酬恩命本輕還家掩屏臥衰涕浩縱橫

醉歌

三十六策醉特奇竹林諸公端可師秋風蕭蕭吹鬢
絲蟹螯正可左手持醉倒村路兒扶歸瞠兒不識問
是誰浩歌起舞夜何其北斗磊落明河移貴人惜醉
渠自癡黃金絡馬誇市兒一朝禍來莫支持新州如
山不可移

買酒

放翁病起不禁愁買酒看山自獻酬八月吳中未搖
落誰令衰鬢早知秋

秋雨歎

淙淙雨聲瀉高秋稻梁浸瀾雨不休志士仁人萬行
淚孤臣孽子無窮憂一身窮困未暇恤如此無事理
有不聖言古訓舉不驗簡編可用汗馬牛嗚呼有粟
吾得食夜睡何時得安席我生猶及宣和年建炎以
來身所歷高皇一言感天地盜賊千羣掃無迹疽囊

雖慘固可醫誰爲聖代施鉞石

憂國

恩許還山已六年誓憑耕稼餞華顛養心雖若冰將
釋憂國猶虞火未然議論孰能忘忌諱人材正要越
拘攣羣公亦采芻蕘否貞觀開元在目前

夜意

居家元是客在俗亦如僧點滴檐間雨青熒帳外燈
壯心終蹭蹬去日捷飛騰不及寒沙雁來時下杜陵

大風雨中作

甲寅八月二十三日夜

風如拔山怒雨如決河傾屋漏不可支窗戶俱有聲
烏鳶墮地死雞犬噤不鳴老病無避處起坐徒歎驚
三年稼如雲一旦敗垂成夫豈或使之憂乃及躬耕
鄰曲無人色婦子淚縱橫且抽架上書洪範推五行

題齋壁

閉門無事不勝閑心境超然一室寬香岫火深生細
靄硯池風過起微瀾睡餘但欲依書几坐久還思弄

釣竿擾擾平生底事鏡湖歸隱老黃冠

開門又

手斲雲根結草廬平生心事滿無餘
二升菰米晨炊飯一椀松燈夜讀書
天理直須閑處看人謀常向巧
中疎煙波有趣君知否裂網伸鉤也得魚

窮途

窮途多感慨老境少知聞
酒裏閑消日書中自策勳
全軀希碌碌掃軌厭紛紛
每愧吾鄉老頭童念致君

先友傅公給事莫年髮髡每酒酣脫幘覽鏡歎曰吾其已乎

貧病

行年七十尚攜鉏貧悴還如白紵初
好事鄰僧勤送米過門谿友強留魚
客來旋過牆頭酒睡起閑抽架上書
要信榮枯元不動曾中浩浩著空虛

秋晚

春粳入甑香炊玉壓酒鳴槽滴碎珠
甲第朱門漫豪侈山家風味定應無

又

新築場如鏡面平
家家歡喜賀秋成
老來懶惰慚丁壯
美睡中聞打稻聲

又

秋菰出水白於玉
寒薺繞牆甘若飴
正是長齋豈不可
凜然大節固難移

又

竹竿坡面老別駕
飯顆山頭瘦拾遺
自古詩人例如
此放翁窮死未須悲

山村書所見

老枳垂藤晝常黑
雛鷹聲作嬰兒啼
伐薪歸來遇急雨
石路下山如踏梯

又

荒坡茫茫牧牛童
扳角上背捷如風
腰間一枝摺枯竹
橫吹短笛過村東

三年前與兒輩步過東
涇小嶺得勝處可營別

野貧不能成偶復至其地悵然有感

前年度嶺踏斜陽曾卜松陰置草堂只倚氣吞雲夢
澤竟無錢買雪堆莊煙脂菱角空頻摘火齊楊梅已
再嘗事不如心居十九往來常羨捕魚郎山多楊梅有
合抱者下臨鏡湖皆菱蕩

園中秋夕

季秋哉生明風露正悽冷放翁澹無事樂此清夜永
飢鷹棲不穩勁翅起東嶺湖邊千樹柳何處寄幽影
人生寓宇內俯仰一炊頃此心無媿負簞食均五鼎
許身輦稷高終亦輸箕穎天風倘可乘采蓮登玉井
秋晴每至園中輒抵莫戲示兒子

老翁七十如童兒置書不觀事遊嬉園中壘瓦強名
塔庭下埋盆聊作池青蒲紅蓼共掩映病棕瘦竹相
扶持衰頹已作老驥臥來往尚如黃犢馳但知身存
百無害莫問老健能幾時汝勤挾策乃堪笑且共飯
豆羹秋葵

醉睡初覺偶作

小圃醒還醉幽窗起復眠
虛明炷香地清潤斷花天
老去才雖盡窮來志益堅
阿瞞那可語平日笑橋玄

汪茂南提舉挽詞

學已三冬富書猶萬卷
藏名場雖蹭蹬朝論極揄揚
小試襦袴詠遂辭鷓鴣
驚行秋風九原路挽鐸倍淒涼

又

往者紹興末江淮聞戰聲
上流煩舊德下客辱深知
陳迹成今古追懷每涕洟
郎君雖不識撫事亦增悲
先相公督師荆襄游首蒙招致幕府會留樞屬不克行

謝徐居厚汪叔潛攜酒見訪

我雖生亂離猶及見前輩
衣冠方南犇文獻往往在
幸供掃灑役迹忝諸生
內話言猶在耳造次敢不佩
殘年趨死近孤學與時背
妄出更何求終老事耕耒
史君稽古學力大障橫潰
廣文亦偉士名字震當代
同舟肯過我凜與前脩配
憂時抱忠鯁論事極慷慨

嗟予雖益衰耳目幸未廢何當卜鄰牆早莫聆警效
喜鄭唐老相過

鄭子有書癖對書百事忘頭亂不暇櫛鬻冷不暇嘗
持此金石心力求古文章吟哦屈宋作蚤夜聲琅琅
方揮却日戈恥窺及肩牆不見今六年所得非復常
扁舟夜過我劇論神激揚徐出二三篇稊米於太倉
已足起衰懦黑絲生鬢霜使得盡見之殆可鍼膏肓
願子繼自今勿惜傾錦囊因來數爲寄歲晚慰所望

秋晚散步門外

栗里歸栽菊青門隱賣瓜羸軀病天色衰鬢怯年華
野曠烏聲樂溪清雁影斜門前秋潦退也擬築堤沙
潦水壞道數丈方與鄰曲共修之

寄徐秀才斯遠并呈莊賢良器之

徐子作別十年餘無人可寄一紙書閉門美睡畏剝
啄自怪一念常關渠西風蕭蕭吹槁葉秋光正滿蝸
牛廬讀書易倦出無友撫几愴恍空愁予蜀莊之孫

住南郭亦復迹遠非情疎何時同載過老子共飯赤
米羹青蔬

閑中

閑中高趣傲羲皇身臥維摩示病床活眼硯凹宜墨
色長毫甌小聚茶香門無客至惟風月案有書存但
老莊問我東歸今幾日坐看庭樹六番黃

秋霽

驅除雲霧極知難敢意天公不作慳汛掃中庭待明
月攀躋危榭望青山取琴理曲茶煙畔看鶴梳翎竹
影間不爲新晴宜著句擬將幽事破除閑

晨起

晨起梳頭拂面絲行年七十豈前期此生猶著幾兩
屐長日惟消一局棋空釜生魚忍貧慣閑門羅雀與
秋宜區區名義真當勉正是先師戒得時

筌篔謠二首寄季長少卿

庭樹非不榮霜霞萬葉枯朋友豈我棄漸遠勢自疎

中夜起太息發篋覓舊書塵昏蠹蝕損行缺字欲無
一讀色已變再讀涕淚濡卷書置篋中寧使飽蠹魚

又

少壯離別時回顧日月長會合終有期何恨天一方
我齒如敗屐君髮如新霜餘日復幾何萬里遙相望
欲泣老無淚欲夢不可常寄書何時到江漢春茫茫

悶極有作

貴已不如賤狂應又勝癡新寒壓酒夜微雨種花時
堂下藤成架門邊枳作籬老人無日課有興卽題詩

自詠

常記當年入洛初華燈百萬擲樗蒲平生意薄刀筆
吏投老身爲山澤臞已罷向空書咄咄尚能擊缶和
嗚嗚今朝客至無尋處正伴園丁斲芋區

夢范參政

夢中不知何歲月長亭慘淡天飛雪酒肉如山鼓吹
喧車馬結束有行色我起持公不得語但道不料今

遽別平生故人端有幾長號頓足淚迸血生存相別
尚如此何況一日泉壤隔欲懷雞黍病爲重千里關
河阻臨穴速死從公尚何憾眼中寧復見此傑青燈
耿耿山雨寒援筆詩成心欲裂

乞奉祠未報食且不繼

富貴常求繫日繩陋窮却羨棄家僧強顏始覺貧爲
害對鏡方嗟老可憎出戶風霜欺短褐讀書父子共
昏燈聖師夢奠二千載一卷遺言終可憑

山寺

信步得佳寺入門吹斷香林深栗鼠健屋老瓦松長
吊古增悽愴憑高寄慨慷忽忽興未盡新月映方塘
太師魏國史公挽歌詞

早擅淵源學常懷懇款忠雲龍際千載典冊冠三公
論諫寧中止謀謨不苟同此心誰復識志士泣秋風

又

位歷公卿貴身兼將相榮珥貂儀一品錫帶價連城

入告推忠厚躬行本志誠斯民何以報萬里徧春畊

又

道德補天石勛勞夾日龍犯顏無不盡造膝略皆從
歲貢來戎幣秋防滅塞烽畫圖麟閣上猶足折遐衝

又

舊弼初收召惟公力贊揚都亭移供帳全魏徹封疆

大度寧猜阻羣言自中傷拳拳虛左意猶可質穹蒼
公初扳附即力薦張忠獻公于壽王如賜館都亭驛超封魏國公皆公
密奏且嘗乞用張公為首相而已佐之

又

攏干勞久戍大將未班師抗議回天意忘身為聖時
人心嶮莫測時事遠難知汗簡方傳信孤生欲語誰
吳璘戍德順軍師老欲還不敢自請公為相察其情即力請班師西鄙
賴以無事後議者乃指公為棄地公不辨也

三峽歌

乾道庚寅予始入蜀上下三峽屢矣後二十

五年歸畊山陰偶讀梁簡文巴東三峽歌感
之擬作九首實紹熙甲寅十月二日也

神女廟前秋月明黃牛峽裏莫猿聲危途性命不容
恤百丈牽船侵夜行

又

不怕難如竹節稠新難已過可無憂古妝峩峩一尺
髻木盃銀盃邀客舟

又

十二巫山見九峯船頭彩翠滿秋空朝雲暮雨渾虛
語一夜猿啼明月中

又

錦繡樓前看賣花麝香山下摘新茶長安卿相多憂
畏老向夔州不用嗟

又

險詐沾沾不媿天交情回首薄如煙東遊萬里雖堪
樂灑灑瞿唐要放船

又

蠻江水碧瘴花紅
白舫黃旗無便風
涪萬四時常避
水棚居高出亂雲中

又

亂插山花簗子紅
蠻歌相和灩西東
忽然四散不知
處踏月捫蘿歸峒中

又

萬州溪西花柳多
四鄰相應竹枝歌
問君今夕不痛

飲奈此滿川明月何

又

我遊南賓春莫時
蜀船曾繫挂猿枝
雲迷江岸屈原
塔花落空山夏禹祠

十月三日泛舟湖中作

桑落可釀酒艸枯可呼鷹
平生當此時意氣十倍增

卽今境界別千錢
買短篷鏡湖三百里
往來寒日中小甌炊彫胡
玉食無此美臥聞水鳥聲
世念去如洗

知此恨太晚享此恐不足南山忽已昏更就漁村宿
早行

寒漏參差斷晨雞次第鳴匆匆半枕夢草草一盃羹
澤國多逢雨閑人不計程雲間出寸塔迎我有餘情

晚泊

樓上嗚嗚角橋邊點點燈聚沙新到雁趁渡獨歸僧
日隱山光暗天低海氣蒸居人笑老子醉髮亂鬢髻

遣懷

莫年世事轉悠悠攬涕悽然類楚囚不道渾無排遣
處病觀周易悶梳頭

舟行戲書

世事無窮膏火煎羈魂病骨久羸然覺時不及夢差
樂死去始嗟生可憐慷慨知非請纓日推移忽及挂
冠年揚帆海浦差強意臥看秋濤蹴遠天

